

知非堂稿

何中

文碩閣

wenshuoge.com

目录

关于我们 3

提要 5

原序 6

自序 7

卷一 8

卷二 21

卷三 31

卷四 44

卷五 54

卷六 65

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部五

知非堂稿 别集类四【元】

提要

【臣】等谨案知非堂稿六卷元何中撰中有通监纲目测海三卷通书问一卷皆别着録据中自序所着尚有易类象三卷书传补遗十卷吴才老叶韵补遗一卷六书纲领一卷补六书故三十二卷苏丘述游録一卷摛颐録十卷今皆未见惟此集仅存然自序称有知非堂稿十七卷外稿十六卷顾嗣立元诗选载知非堂稿十七卷与自序合王士禎居易録作十六卷亦与自序外稿合此集止六卷似非完书然嗣立之所録与士禎之所称者已均在此六卷之中又似无所亡佚者岂後人传写或合并其卷数抑或重为选録汰其繁冗故篇帙虽减而名章隲句一一具存也诗集之富唐无若白居易宋无若陆游杨万里而珠砾并存往往使後人以多为憾是编佳制具存而芜词较少可谓刊糟粕而存菁华即非足本亦不必以不完为歉矣乾隆四十四年四月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

知非堂稿原序

夫言之秩然次序条理者谓之文文无待於作也後之人口之所言杂乱无纪则必締构於思撰造其辞而後笔之於简牘古人虽不作文孔子尝云辞达而已矣此固作文之大法也而奈何作者之不知此哉东汉以来气弱体卑无复有善作者至于今殆千余年唐宋盛时号为追踪先汉而仅见韩柳欧阳曾王二苏七人焉若李习之若唐子西若张文潜非不游韩苏之门而竟未与韩苏合一也兹事岂可易视哉表弟何中太虚少负逸才弱冠已能诗而亦用意於文至顺二年春予卧病顾予於病中授以大集予读之盖优优升七子之堂矣予不胜其喜非私喜也喜斯学之不孤也斯学也虽非儒者之本务而其格力之高下实气运之盛衰关系又岂小小哉病余倦於书然喜之不极为书其後而还其稿前翰林学士资善大夫知制诰同修国史草庐吴澂伯清序

自序

知非堂稿自序

临川何中能言知读书咸淳壬申甫髫随父仕广东曲江乙亥出岭至元丙子侨居宁都隐避浮寄者三年己卯始从师问学师宋进士张叔方朱光甫罗士鼎於前辈屡尝亲刘会孟识谢君直姚端夫王肯堂交甘咏之程钜夫李士弘元复初揭傒斯全止所当世知名士多友善於吴伯清为姻兄弟云至大戊申如析津皇庆癸丑适东瓯所着易类象二卷书传补通十卷通监纲目测海三卷通书问一卷吴才老叶韵补疑一卷六书纲领一卷补六书故三十二卷苏丘述游录一卷摛颐录十卷知非堂稿六卷知非外稿十六卷延佑庚申夏六月朔临川何中太虚自序

卷一

钦定四库全书

知非堂稿卷一元 何中 撰五言古诗

别谢提刑

戊子十一月二十四日拜叠山先生於双桐驿盖先伯见山同丙辰理宗亲擢也先生叙旧好言同心焉明日中赋二诗为别

峩峩楼观地寂寂风雨墟可怜零落身万里投修途窈窕千蛾眉已奉他人娱主恩天罔极苟生岂良图行行重行行善保千金躯别怀不敢诉顾步复踟蹰

二

吴门白日落孤妾悲洞房徙倚无所归朔风满罗裳昔为春柳阴今作秋菊黄芳景不速尽愁心与俱长逝者魂魄在九京共徜徉粲粲河壮水萧萧天雨霜出门即远道死生永相望

安上人兰若

独寻小兰若积翠森松筠禽声悟禅家幽花吐清芬晴日水光合时飞野鸭羣娟娟前山秀适来何处云清心欣有得淡焉失腥氛道人煮春茗离坐与晤言亦忘此境遽两耳天乐闻何当脱世网於焉穷朝曛

菊

我畊不半亩黄花列千丛萧条变衰时一夕万里风孤立不作难英英异风骨君看墙东客夜寒步霜月

又

黄花来何晚及此秋霜繁寄语山外人弃捐我何言幽芳具四时要在培深根我来绕花行我道将无存

又

菊花如幽人梅花如烈士同居冰雪中标格不相似道里阻荒塞故人万里余菊枝傥可折持以寄远书

墨梅

客携数尺纸手展墨色鲜江梅发疎花萧然瞰清川澹月挂寒枝孤幽弄芳妍岂非立雕後或是标春先日月相往还何用悲岁年此花於此时好修乃独贤处士穷幽居羈臣怀左迁裁诗孤山雪拥屨罗浮烟我今亦何恨仰视空青天世俗不贵真共把墨粉传玄帝虽令严此花不俱玄于何幻素质物性亦复然梦中如闻香残更悟醉眠起来索梅花寂寞江之壖

读史

桓桓韩将军当年谁寄目岂无漂母食亦有胯下辱雄劒一朝飞举手拾秦鹿风雷走倏烁乾坤困驰逐荥阳广武间楚汉寄我足王业四百年尺封屡翻覆赏厚岂势摇功成乃身戮所贵英雄人岂甘草中伏谁为後来者感此空碌碌举头见青天天边有鸿鹄

又

嬴法四海热震荡昏三光云飞大风起赤子沐清凉当时周旋人一瞰罹身殃悠悠赤松子不识为何祥千年有崔浩前修持自彰岂知魏所事乃是元家王恐非凤衔图但见鴈求梁伊尔山中人勿弃兰蕙芳

又

鼎移炎德烬南阳尚躬畊胸中经济事感我三顾诚保蜀非王基何似田一成顾岂志功名乃欲表忠精煌煌汉家业草木岂无情谁知邺中儿元是汉人生运去身或移事往恨难平悠悠梁父吟终古有余声

穆山山中

江南有丘壑我生良独闲秋风二三友竭来游兹山山深不见寺但见飞泉寒地行两山挟天风鸣佩环青烟从何来堕我泉林端未知有径否钟磬犹未残长歌万谷应仰见数峰攢纡余缘涧入侧步寒云关豁然得空旷聊复解破顔殿静薜花润松危鹤声乾僧宝炯数珠相我盘礴观大开双白眼应接几青鬟徘徊日已晚人间行路难猛虎蔽丛薄潜蛟漱风湍振衣出山去大啸惊人寰

杂述

姬末既文敝嬴强沦九畴炎德屹肇基王风遂回輶继继崇禅让终始还相酬忽焉兹道絶鱼羊莽齐州遥知後来者亦与丰沛侑荒哉结绳初尔来几千秋大化不停运有生步其流此时偶际会昔昔射旄头

又

天龙地用马健顺理亦宜谁於其两间赤手握陰机东门一长啸四海皆惊迷向来种桃人此去当何之悠悠黄唐远来者邈难期龙逝白云征马轻九坂驰行行马上郎万里长风吹不见长江边折尽杨柳枝

又

月蠹桂不植桐枯风来迟高峯不顾返尚念荣与衰全身古所贵逃名亦何为自昔青门人不识东陵时天地始一息人道乃如斯昭文已无槩默与万化齐但酌一樽酒得醉聊自怡

又

萧萧白杨风依依吹井烟旷哉上下宇逝者不待年彼陇亦何祥一日几新阡谁招皋某复递哭送九泉高楼当西日落花满寒川流浪旷劫间彭殇俱可怜汉陵春萧瑟回首尚变迁万古一起灭此意何茫然

又

至人守玄宅寸虚莫能倾俯观万化机寓化亦寓生道去终不复行苇有遗声帝者独何居混沌无聪明培风高翮翔冥冥乱云拥周流驾言旋夜寒烟雾重身如江湖樽瓠落岂无用归来无何乡三珠倚孤梦

夜久

夜久【阙】步珠露空盈襟萧条川气高惨淡浦色侵河横星渐转雾厚山将沉鸣虫促繁响蜚萤乱寒陰时物遂如此惻怆抱寸心天将落月去何当复东临乾坤入冥漠衆窍酣哀音欲令万梦觉谁忧独难任商歌浩忘疲俯仰情逾深忽闻鷄声起左右风满林

读晋史

林疎暑风剧牕户殊未凉悠然倦不力吾我已俱忘眼醒见周秦眼醉游轩黄日月山外过兴废枕中藏振衣起长啸六合何轩昂斯人纵高视旁皇复旁皇于焉读晋史感激系中肠言言不能已自笑已如狂

又

哀荣无尽变俯仰还自推陈留既作宾何如山阳时中都血流杵江左中兴基不待卯金刀羸强吕已移天道巧相复人理固易知巢由遇高躅今古无还期

又

天地一虚器所寄在斯人人能主天地岂不贵我身嗟哉嵇阮辈酒乡为隐沦朝醉既及暮暮醉还及晨裸饮或称達喪【阙】廼名真独善谅非计况此国与民被发祭伊川岂不在诸臣
平阳有余恨千载同悲辛

又

蛰龙卧沧渊瑞凤栖蓬海悠悠接輿歌千古消光彩出处酌其宜勿为世所骇预人家国事此
身固有在嗣宗济世心无为着達庄叔夜明养生东市援琴伤一出与一处徒能决藩墙淳风
竟不返二子俱亡羊汲郡苏门山其人游何乡我欲振奇翮碧宇追翱翔

又

高平释时论鲁褒钱神篇晋轍固难挽犹胜谈虚玄夷甫晚良悔将死复何言谁登平乘楼尚
能议诸贤老庄异端学冥合归自然萧曹相业大文景王道便尊尚本非异兴衰由此迁信知
浮论者亡国有余愆

又

江左二百年立国初何恃中夜荒鷄鸣天地皆英气枕戈刘越石击楫祖士稚如此中原间端
能了公事局促并豫州奇功中道坠呜呼二豪雄本为宗社计异类禽兽心推议谅非意石死
故可哀稚则吾何议徒怀墟墓间还念金行祀谁令若思来後代常歔歔

又

两贤不相厄王庾乃如斯天步政多艰此岂私愤时东山谢安石造次威凤仪三贤抱宏器继
出相等夷风流文雅尽同惟世所推但恨立朝间典礼殊未施玄谈竟浇俗逆臣终乱阶汤武
肇王业伊周垂纲维桓景彰伯道管晏横要规古人不作远所立百世师奈何民具瞻退食徒
委蛇卜世固天定欲责当谁归

又

春风满南国公子争为欢锦綉少花艷珊瑚耀日寒美人佩兰麝驄马驰雕鞍酣歌金谷迴笑
舞凉台寬一朝化为血付与来世叹人国亦如此荣落朝夕看悠悠劝进者端似坠楼难

又

填石【阙】 胶杯谁能舟我岂不知我量力乃哲谋有才比管葛感奋为武侯保身慕夷齐静

退渊明俦物亦非所忌名亦非所求北窗羲皇上东篱晋宋秋零陵一杯酒终古属斯愁

秋雨

昔者三月晴厚地裂欲隳积地一月雨厚地融欲糜不知穹穹者若此何以为陰阳相啗柄自怒还自怡风吹黍稷黑下方人怨咨怨咨犹尚可寔自地难持我有斲药鑱于以待朝饥有声不敢吐坐看松雪垂

偶书

桐寒叶落风菊净花开雨掩映半畦秋好竹三四五对此憔悴人忽笑不复语

掩卷

掩卷如鬱鬱鬱鬱亦何似野人每多忧不悟本无事仰观千载前去者极所诣俯期千载後來者邈难至惟我於其间欲策无名骥出门万里远寸挽何能至山空白云合日黑野风驶独默已如瘖闲送飞鸦坠

次罗士鼎韵别罗以通

桐花满天地凤衰竟何鸣岂无双彩翼谁与相目成山长迴风驶道暗浮云征孤飞良独苦吾道宁亏盈廼持一箭书欲破万古城寸心挽来世日月当回精我亦愿追随难可覓形声志合身复乖良晤何难并君持黄金鞭微径所不经我无匹雏力敢拟世上英岂知一日别遂有千载情明发隔山雨何当与细评

游芙蓉山十四首

十里五里石一步一长嗟行行山转高悠悠日将斜萦折抵深谷直下十数家来往自成村桃柳映桑麻崖杉老绦叶石?垂枯花陰凝四时雪阳焰一川霞谁令余到此幽意浩无涯行将办畚鍤来此畊山畬

又

岩岩青芙蓉峻秀琢寒玉危流千丈飞铿鍧石相触幽閤鱼龙宫荒寒雾雨蓄凄神不可留前登散遐瞩参差杂花动香气泛深谷日照丹霞开万峰洗晴緑同心有长鑱缓寻灵药斲葛仙早见招庶得从所欲

又

春风吹衆树春唤如鸣梭平烟带远村时闻樵者歌田父有真乐东皋牧羣鹅烟煖衆草合艷
緑如流波搔首负白日欢然得婆娑事立或福的识深迺愁多西家酒正熟况此天气和

又

侧足上翠微石磴八九折开尽满崖花坐来羣香歇游目尽远空乱数碧簪列草木颇葱茏云
兴复霞蔚不知十日雨还长几枝蕨山中无事业特用慰采擷盈筐归路遥忽见满山月

又

緑峰在头上落月在脚下点点烟鬟开春晴真无价红泉响哀玉苍石饮渴马林穷兰雪香崖
古萝衣挂属闻絶壑底松声更清洒世远事难即趣深月弥暇谁知须臾间白云已无罅都失
眼中奇茫然独悲咤

又

孔雀本毒类文章饰其身翠尾列金花鲜丽足移人持以比百鸟?鹄犹为仁出门遇田父相对
言语真桑麻暨粟麦自有事实存但观田亩间足想二代淳长歌唐风诗笑入桃花源

又

逐日果何益俱至虞渊隈功能宁足夸戮力与时偕移山良自苦负土期山颓山若不自移志
愿终难谐长算恨日短远山惜运推有为未足恃超视良可哀古人日日去後人日日来若复
不自闲千载谁当怀

又

花开风自柔谷深日无晖高萝鸟声转葱翠摇陰霏孤娱有穷深境异心不移东峰虎长啸西
涧鼙争啼运往人理尽物新古道违欣然抱奇怀白云遥相知日夕意犹缅信有忘归时

又

杂花生佳树羣女已出桑村深无秋胡笑语颇相忘着身入淳俗自然和其光时读种树书理
近意更长山林足造化我土不敢荒自时一畦菜苍翠俨成行杀竹插篱援所以贵周防虽无
人我欺深畏牛与羊倘或践吾菜前功讵能偿虽悔复何益空使寸心伤

又

亲友日以疎邻曲时复至相见晴雨外极论畊种事我正春酒熟斟酌无次第开园摘緑蔬淡

煮有真味相劝人一生所得在几醉浅深各尽量但以醉为剂圣人亦朽骨我辈复何恃共赏
此言是更酬到梦寐日斜鸟声乐风过花香驶客散冠巾欹我亦归去睡

又

日日碧山去香草生还踏幽禽识履声间鸣故相狎意行不知远清啸得虚苔石上绿云生岩
下紫烟合莫负今日晴聊折山花插

又

商山非远遐胡为可避世人间已帝秦紫芝尚周味看瓜有奇祸纷纷谁能避此翁良优游乃
为秦所置独恨六籍尊反受陋儒累倘使诚德人罗者谁敢睨萧散东陵侯隐约济南士清风
百世存庶激懦夫志

又

我慕陶渊明能怡田亩情日夕饮名酒不知有此生乞食固非辱在官亦何荣当其高卧时但
觉宇宙轻闲静性独乐不以矫激成极陈形影神尤戒无营营虽非晋宋秋宁计世间名道胜
不知物天全妙无声聊述吾所慕讵更待吾评

春日书怀

肃肃春阴厚众花不敢妍似为天所妬故着急雨湔好丑一时尽园林生绿烟乱云犹峥嵘端
坐自萧然莺声日景迫柳色春序迁心期谅难语缥缈薰香传

又

墙东绿阴好稍觉朝日迟人间事轮囷我枕聊复敲开扉览晓色万端集两眉风狂忽倒人迎
立爱其吹掠我径西去花影【阙】逶迤微吟视青天一笑聊自持相如不妨慢长康政酒痴

我怀何悄悄彼日何炎炎寸心通来古寂寞卷疎帘闲我一丛菊青【阙】映前檐秀色何怡
悦更着雨【阙】添林间此奇事乃许我辈兼聊持千载意以寓百岁淹神龙安可扰不用固
应潜

又

蛙声池上起竹声窗外传吹万不可息聒我春昼眠林外固多累林间复多喧誓欲蹑太清冥
冥不得前以我一寸心焚香小窗边以我无尽目送此有尽烟

溪行

悄悄抱孤怀悠悠步芳甸微风动半林细雨湿双燕高堂狡狴人一瞬幻千变似嫌俗眼白遮断远峰面参差双鹭下点破寒溪练立处不近人忽去何所见

李千户至自南海分遗椰实喜赋

乱余乏佳实贱者犹贵之招呼梨栗辈已作席珍推岂无仙人枣无蹊至山蹊桓桓李将军色映海峤奇归马驮椰子溲落魏瓠垂徇华穀初剖濯濯脰玉肥来饷山人意重千金遗香醪【缺】石髓味腴轻肉芝尊前有南海顿压衆果卑向当逋子龄侍亲曲江湄啖此不知厌亦与槟榔宜既别十五年犹有梦往时故人忽相见唤起三生悲遇旧心易快感至情还移百年能有此再见安可期子西忧蜜果东坡叹荔枝虽云供贡劳吾念君臣仪安得白玉盘登之白玉墀万古还纲常不令世愈衰苍茫叫虞舜魂绕天南维梅花满庭净香烟一帘迟椰盃更自酌聊欲捐余思

岁晚咏怀四首

陰风入空林玄云冪平野薄帷负閤寒飞雪鸣古瓦抱衾不成温孤怀浩难写荒荒豺虎区三殇无遗者王风同列国安得犹存雅黄竹声久沉伤来泪盈把

其二

前檐立闲夜园中珍木长雪云正澄澈霜飈复飘扬衆星凭幽闇各出争耀芒东方起圆月失此万点芒不有照烛功何以尊其光安得骑蟾蜍偃息桂树傍

其三

天霜不停威寒荃日以槁厉飈竟欲脱未许依藁老南山多白石终岁常皜皜乃知得至静超然全所保妄尽无非天心宁不违道雕落奚作怀锺山有神草

其四

门扃幽树声牕销羣峰影寒气迎遥夜華星在西岭秋虫无余声时雁有新警天机自消长冥参得深省名衢万里辙理海载孤艇力弱昧前驰心强遯真境即俗幸无能淡然聊自领

城中雨後

何处山中烟移向城陰飞乃知一雨过光景与昨非心虚纳浩荡神迈得精微勿语马上郎痴我似我讥鸟雀十数点空翔若无依城中弹丸多故林应未稀

华盖山

三山立天半苍翠横古今断崖三万丈花落紫烟深路蟠一带危上薄元气侵乱霞导飞舄闲云护行襟风岩虎豹穴泉壑蛟龙吟川明散衆色空碧生清音仰憩星河次飞鸟下堦临肃然刚风近仙人抚瑶琴立身如此高人世宁不钦苍茫万里色浩荡一寸心期为太清游不独往山林

又

三山白云合乘我空中行天近通一气风清来远声翛然卧高寒五晓天鸡鸣下临人世秋纵览鹤驭轻翩翩半崖端稍稍千村明余云垂衆壑龙凤纷送迎忽然各散去放作世间晴日色到远林轻烟霭霭生乱红点长空罽罗已相惊丈夫有高步所冀还丹成圣人似尧舜巢许犹逃名礼华与乐叶俱随秋树零纷纷各在眼叹息难为情

松野即事罗氏园林五首

娱心仗老筇细数诸峰影微烟过前树淡日有半岭幽鸟识归宿遑恤云路永冥鸿各有见日边半行整出处无定期是非谅难省归林忽已夜夜月变光景

其二

采采园中菊青青不堪摘沉思何不开我土槁无液汲水聊一溉誓欲効绵力讵能乐安闲所为造化惜少年莫相猜此意君应识属闻毁折多使我愈戚戚

其三

山窻一丛蕙修叶吐紫蕤或云断续花我亦岂敢疑楚泽多芳草真伪奚难知浮俗尊虚名君子伤令姿博观贵自得清芬良在兹枝叶安足辨但令无自欺

其四

两禅着冠巾园林步逍遥微风所披拂衆树皆荡摇悠然一眺间快甚羣忧销紫气涵远村高霞照青霄薄暮忽行旅平畴散归樵亦复掩幽扉夜意终寥寥

其五

闲云正相聚长风歛散之聚散每如此我怀焉不悲仰观何所见所见天离离但当饮名酒寸心始不移醉中无一事去尽识与知数树洞庭霜足为岁寒资松柏即宾客终始无瑕疵

远离别

空村落叶乱旷野飞云迟抽尽园客茧难比妾相思自从出门来足茧坼兆龟夜宿茅簷杂晓行霜露凄仰攀千重岑俯涉百渡溪骨肉无一在亲戚知为谁羣刀血模糊杀人相娱乐嬉有声不敢吐有泪不敢垂妾魂久已逝妾身终何之行行忽遇兵扰扰贪获资力战岂不胜何意救蒸黎乡兵又妄掳无异在贼时朝汲风激面暮春日皴肌妾无使令者远胜妾在兹寄言北去鸟妾死君得知自从结婚姻得备奉盥匳幸甚终所托可保黄发期苟死又何憾有此生别离自尽亦非难冀君赎妾归君心宁絶妾望君君来斯又恐多险艰为妾使君危怫鬱一寸心撩乱百结丝牵牛与织女乖隔始不疑昨夜梦到家银烛照华棖梦觉恍见君回回日如迷果如两龙劒长怀想望悲人人恍如妾何以生世为

游烧香寺於道傍折桂而归遂赋

欲捐世间忧径寻林下寺古松工听法幽鸟静通慧钟撞清国声台识先朝事山僮侦茶候道人玩香穉回看争夺区始了西来意无生安得灭有患非所致金仙一何高淡然无可累茫茫旷大劫幽草供深翠出门见东村孤吹随风驶前林衆木奇醴薰隐幽桂飘扬满虚空狂逐浩无际冥参超欲仙【阙】玩倏已逝偶闻非售知抱奇宁立异讵能媚司命深叹招隐士持归难赠人铜瓶且勤置

秋日山行杂兴四首

独往非避俗散怀聊寻芳流风淡翠麓理策秋路长苍石含幽色樛木落寒香一片太古云化为孤凤翔忽然归紫霄荡漾不可望浩歌向夕霁敢事接輿狂

其二

山回杉樛清崖倾花雨下讵知吾道非偶然适旷野磊落万陨星赴流饮奔马风微叶时落磴寒雪自洒孤松紫萝转幽峰抱岚炮景晦良遇稀心异真赏寡举手谢时人岩陰栖古瓦

其三

晚山菡萏开浓秀映秋碧长风泻万里寒花落石壁云气静欲消霞光乱相射缥缈浮丘翁素手垂鹤翼笑看蓬莱波与世共陈迹天地无恒春羣儿倚少色功名犹自误口体乃相贼安知骨为尘不得同瓦砾

其四

运去絶荣念化迁悟妄身舞智巧行杀亦笑荣公贫深谷无近患寒萝抱余春幽娱淡忘归山水无缁磷风生禽响发雨歇草色新回眺宇宙间忽觉无一人长啸断崖侧悄怆将何亲骇机

满岐路踏步安可轻所来为流泉倚石得细聆激烈苍龙笛雍容紫鸾笙清辉洒空曲余韵盘林局至音含元化抑扬极和平区区理桀丝倾意俟人听可怜望知己断弦复何情

由书堂寺入夫容之麓五代时有胡先生隐居其地寺故名云今碑不书有游生者写华严经留寺清整可观生宁宗时人

雨歇入幽麓朝气笼淡晴夷途何所虑乃此沿流行夭矫玉虬飞惊波候天明急播万珠络逴应千雷轰忽激羣鹭跃徐肆游丝萦曲曲揭清浅盘盘度峻嶒明生一掬绿幽閤两林清胡为夥生聚却美非世羸苍烟出磬响深谷藏经声闲过小兰若茶香满前楹谁写天竺书秋雁点寒汀盛代安可及隅谷有精能尝闻昔五季胡君亦豪英读书向此地诂冀千载名俗士轻高人不著石丽牲空令绕竹泉长作琅琅鸣寸心持余感出门陟寒青駁石当目隙高下拥精灵朋聚鸟【阙】伏孤兀苍虎狞左峰覆欲压右崖危将倾乾坤有此险始【阙】性命轻前迈忽自晒天定亦何惊万杉列云际浓淡因云成佳椽交翠竹茅屋矗相凭向来看画意尽向眼中生老翁理泉窦东菑秧事兴隃谓乐如此翁顰诉其情历述先朝美言罢泪纵横方余起醺美属闻意冥冥古来多隐者全身一何精将非智不及亦岂福难胜不然幽胜地自可饱苓苓放麈心不忍力极还小停歌吟杂悲乐写之苍石屏他年有知者此语良足徵

白马篇

冥冥子规林萧萧洛阳路白马谁家儿扬鞭西南去去去知何为不辞还泞苦陰阳速相禅乾坤几新故丈夫慎驰骛【阙】渚已艰步悠悠独鸟没雾暗连村树

黄塘渡

早闻东吴路今识黄塘滩聊乘舴艋过一篙济艰难绿秧映屋秀古木垂村寒旷野何所尊乱跃千平峦回眺寒烟外浮屠乃上干乾坤我来迟促促宁遑安遥谢山中人合眼无悲欢

文江夜舟

北斗一何渴下饮空江流南雁知何愁相唤不自休东浦征人归孤灯出篱幽西渊捕鱼急飞火走一舟汉皇极寛仁今年租税优有生亦扰扰吾道更悠悠

箬岭人家

溪回谷深盘石厄水成布风吹岩下云挂在溪东树雨深两岸花高下楼台聚安知主为谁倚遍栏干去

又

秩风流平野麦云抱长洲积塘数株柳高墙闭孤楼生当宇宙间此劣宁彼优殷勤有双燕相语知何愁

望玉笥

岸转苍石踞长松垂青萝政当停棹时江入柳陰多斜晖泻列岫荡漾万金波倚舷一回头暮气忽嵯峨羣仙醒心处许我勤相过洞天无衆竹去去将如何

登北山塔

闲驱葛陂龙急追数峰雨仙人专幽奇我亦微径取山花带云香徘徊緑承宇身行元气表心明万里俯我今为我役出没尘潦路仙人何超然应笑我如许何当寄此山隐几玩今古

东湖别吴伯清周栖云虞伯生诸君子

炎炎白日长窅窅孤云去身縻心久归别至情更苦良时难骤得异县不同聚名都亲友并并翔文鸳羽处独忽多闻至乐欣所遇析理挹清风吟诗看疎雨鸣桹挽幽听评帖劣前武有时纵登览江山见吞吐行襟浦草青解带湖柳舞兹游岂不佳归来胡遽赋顾惟山林姿终非城市侣故园芙蓉华緑池照茅宇我怀讵能忘宁为倦羈旅长歌招隐诗诸君果何许他夜宿山邨明月照去住

寄揭曼硕

急程惊语离知问枉敦艮伟子谌多才凉齎每余困水收閭浪起雪解河柳润同行谅佳携芳草发清瞬名都许当达一官子难逊皇鉴洞渊【阙】深储畅閤论达行异穷誓恒为高贤恨勗子振清风余今媿幽钝

聚远楼分韵得笛字

彩榜聚远题登楼记畴昔一尊集七贤共领诸峯碧云树分村容岚霏长溪色点点鸦影翻沉沉市声寂古来多胜践谈笑不知夕欲去重倚阑寥亮沧洲笛

梅

一径苍苔深梅龙着花早初回天际春更觉江南好月色冰霜寒角声天地老寄语宋广平时无苏味道

题黄壽伯玉泉图

匡庐三叠奇昔蔽今乍显美玉倘可求佳泉谅难见朝晖琼膏煜夜彩白虹贯比德世所钦含
光外非銜源往丰大川云升泽九县在山孰为贵出门敢云贱如何市朝人为起山林羨

知非堂稿卷一

卷二

钦定四库全书

知非堂稿卷二 元 何中 撰五言古诗

赠元复初二首

暖云流青堤光风转芳甸远在天一涯幽沉限闻见点点秋归鸿翩翩春来燕天路万里通胡
宁絶遐睎奇姿夺南国怅望愧疎贱良会慰夙心愿君毕欢宴

其二

朝采山巔苓莫采涧中藻心同媒岂劳结言不在早深知各偃蹇非要一时好托轻身易捐百
年不速老緑陰莺乱啼相携玩芳草区区幸识察庶得坚所保

春风如少年效程汉翁

春风如少年狂逐无定处垂杨曲江堤细草东郊路只言今似昔不悟新非故流水何时归残
莺数声暮

西湖山

峩峩西湖山灵秀入空碧萝陰转累磴松色渍幽石微霞生絶陁飞溜洒欹壁鹤鸣岩光动花
落云影拆危椒登古坛百年此一息声影混大荒不见兴灭迹刚风三天寒元气万里色怅望
仙子期凝神抚玄极

皈信寺近曾文昭公墓次

緑柘茅舍村青山晚烟渡何处櫂歌还直入深林去隔畝数声钟鸦啼翰林墓

程氏山房燕集是麻源第三谷

芳村暖微煦衆岫分余?逶迤望远壑趣得心转延洞开石扇仄礧厄濳流喧居人隐古俗香气
通幽禅艶緑度画梁语笑相後先飘飘纵飞屣松声正锵然窈窕山曲 丽构朝霞鲜黝庸在
庙廊杰阁储芸编缅怀康乐公奇踪此周旋诂知有今夕聯集玉堂仙羣鹄亦与喜共舞芳尊
前无情尚相感矧当後诸贤畅饮抱真适远心寄微言兹游即千载湛辈期俱传

招仙观

逶迤溪南路窈窕招仙谷空堂两道人残碁映深竹一叶响疎篱双鸦啼高屋出门随归人远
烧在山麓

知非堂夜坐

前池荷叶深微凉坐来爽人归一犬吠月上百虫响余非洽隐沦隙地成偃仰林端斗柄斜抚
心独凄怆

游乐安穆山寺

秋陰出南郭佳色来远山悠然渡野水却宿前林间朝气锐幽步相携上孱顔行穿緑萝远共
爱青杉闲已穷高原路忽得双石关飞烟带香气深木藏幽潺景晏钟磬寂桂花满苔斑道人
一尊酒时听风珊珊多悟从此始尘缘凉能删空廊对微雨亦复不知还

宿田家

村暗烟火生林深鸡犬静麦花如积雪月色淡相映邻家夜汲归寒虫满幽径

发新淦金水亭

振衣上野航回首谢山阪日淡秋水空风清片帆远沙光侵岸发峰影随人转前渡烟火深离
亭路今缅

小孤山

牵牛与织女河汉有时渡小姑緑发深隔与彭郎语流水去仍回望郎郎不来精神有相贯形
迹难相猜年華朝又暮江头晴又雨灵风吹断矶行人听钟鼓

晓发辞夫矶时李洄漑之友先行

荻暗鸡鸣村平皋下残月参差邻舫语櫓声带潮发露华望中白篷陰散秋发沙鸟知曙鸣海
云上空灭念我前行友青山已飞越迟尔及相携无嗟赏心歇

龙潭阻风夜兴

水宿滞前期前津北风恶林寒灯影深莎鸡满篱落荒忽寄孤迥凄清愧离索年光星河转夜
气衣裘觉我前劲翮翻我後大鱼跃潮痕侵柳根移船避沙阁

淮陰古城

牛羊上荒城茅茷深樵路钟室叹良弓此有韩王墓
名本何成早被鄴侯误闲寻旧钓矶杳渺苍波暮

望新安山投宿不及

踰淮数百里欣逢下邳山新安十数峰窈窕霞影间
遥看若可即既近杳难攀契深迹莫遂怅然空厚顏
倦鹭辨沙落远禽求村还已暮将何归田涛冒溷湾
渡口双古柳茅茨相与环清时寄孤枕敢厌闻惊潺

歌风台

神鱼鳌远海雄鹄陵高玄区区一亭长帝业何赫然
光芒三尺劒羣雄让锋先嬴项屹山岳扫灭如飞烟
故乡偶一归父老相周旋百感忽中起深情何由宣
往时同功人今乃不一全害能亦宁忍远计有未便
矜竚视孤影三侯发尊前丈夫英雄气儿女泪迸泉
纵观能几时忧虞浩无边西风吹古台老屋欹河壖
低徊一长啸乾坤多材贤

登李白酒楼

当时谪仙人四海蜚英声偶然此一醉遂有无穷名
叔世尊放旷中度翻为轻颡波浩难返忧思谁能平

同乡客

遥见江西船认是同乡客何日发龙兴迎人问消息
长河落雁秋古渡啼鸦夕不见楚天长重重暮云色

影儿湾看落日

玄识超象外精闻洞心知谅非耳目及难用寻常疑
杳杳大荒濶紫毫散天西垂轮忽渐侧綠水浮金龟
昔我事畊钓严溪恣愚痴秋风影儿湾夕景无前奇
六奇孰云广余行亦非迷挥弦访太容链石寻安期

酬揭曼硕重赠

岁晏君独留路长我将发林居难共语帝里易成别
煮水逐人饭依树因车歇今夜抱衾眠街头响钟絕

宿十里村

朝出顺承门暮宿十里村臂鹰猎骑归积雪明郊原居人喜客来汲井邻墙温羹汤稍暖热饼饵亦烧爇此夕羁旅意深知路人恩重林隐城堞昉此劳心魂

涿州道间雪霁

昨日饭良乡今夕涿州城此路有终去安能缓车声平野散寒景流辉起浮英蒙烘远树密落削僵柳明獮律共鸦牧团瓢忽鸡鸣殊方雪初霁余抱孤赏情胡尔同车人苦云路难行

河间晓行

归人心久归车夫苦相促衣裳急披揽衾毯自装束寒深肌骨痛夜久情怀独万里多往还他人媚僮仆霜枝叫羸雀雪径过山鹿望墅欣海霞辨烟识村屋饥寻麦粉龕到夕当得粥南中好男儿閤廛絶行躅河间堠子多毋烦记生熟

早发东阿午经东平晚宿汶上是日雪

严装齐地晓授馆鲁乡暮天寒客心速雪下车声去迷兽出桑畦流人披野路浅霭须城山斜桥汶津树前圣有遗业恂恂经行处荷蓑与耦耕何其得深趣

淮安道中

钟声起前林悠悠向南客天垂大野高月淡行路白鷄犬淮上村云霞海边色旧时塞垣地来往人驰驿

得风自施团一日至梅根

泝游缩程期景气异昏旦波声船头响旗尾檣竿转施团方入望忽过繁昌县雄吹彻瀛冥陰色形怪变凌虚旷超軼坤六酣龙战几日西南风去帆眼中羨苍苍水云乡九华今不见

南浦旅怀

乡近岁已阑犹为候风客落囊盖篷深三日不知息浦树分城烟水明远沙色满筐红竹枝渡人隔村夕久滞妻孥望孤还友朋惜音形两睽离情生自难抑

朱方偶作

雪余春水生日上暖云泮杳霭松林中柴扉起樵?新粧携童稚邻曲欣年换坎坎村鼓鸣沙头酒声乱江西田家乐丰岁犹盛观山市溪桥春还多看灯伴

访程汉翁不遇赋寄

高躅洽冥栖钝资得睽阻逢人问来期指日往城府俄闻幽轸至迎候急江浒沙柳归流风陰虹割飞雨还同骑马客寻竹叩深户多蘊喜顿倾失覩还茹苦度鸟遗还声絨情促归武悵悵新城云秋山事晴妩幸因揭阳侯【谓曼硕也】日日问玄悟

酬彭通复怀友见及之作

畴昔到沙步芳时感嚶鸣日华起【阙】采林香散树英虚馆许行李轻【阙】下鍾陵还期念当远枉瞩欣欲惊新句出良斲慵疎媿专精天质谢人饰状妍终莫能程兄守丘壑揭弟【阙】神京出处各乖濶能不劳深情蹇劣忝相厚如何归思縈溪人尚贞素迷复悬清评

暮行城东怀程汉翁因寄

倚郭起遥悲日下沧波阔何处是新城层峰翰飞灭始反今悔误沉想还成结百里诡称遥长年忍为别回风归山霞道景发沙月独殷今夕情凄迷转城阙

丹霞洞天

飞鳥落丹霞苍然洞天划草木皆异香烟霁有灵色寒苔洁宜坐幽水甘可涤樵子指峯赏野翁教药摘琳宫积筠陰虑消景难戾道人供仙茗疊疊古所历唐王悬旧照唐帖式遗墨使年知几何山前事多易稽首浮丘翁归与紫玄宅

照武西塔山报恩寺

山椒敞禅扃幽欣失微倦密林稍深沉新笋亦葱蒨磴折迎空香台虚得清嘤芸芸趋前尘往往遗胜践始知佛力弘能使地灵见市声俯一席山色照三面郡小览易穷兴高赏难徧微生谅何缘周流散遐陬

浴侯官汤泉

天气稍清穆桨声泊荒津汤泉洌山半取径娱幽沦解带散疎发掄漪澡闲身畅然肢体舒洒若襟怀新其下多嘉树细花落缤纷和风来树间芳气通微辛繁陰屡移席俄令鸣鸟亲无为急行返殷勤谢舟人

三仙謠

红纱笼玉香金翠綉鸳小鹤顶压青丝斜戴花枝袅何方马上郎下马佯惊悄罗扇掩微頰答语相縈繚郎有千金重妾惜容华少怕不称郎心看郎几曾老

苦热得雨

炎德王瓿骆羈羸负天刑不为冰谷留乃使熟阪经几席集蝇蚋輿台乱猱鼯居烦易激疾习
静难遗形每倚高阁立但爱方山青林端动虚籁殿角摇飞霆雨影袭虹气土香襍龙腥脩脩
改神虑肃肃宾仙灵散襟淡幽仁稻花如雪馨

九日

属耳喧令序虚旻景清温久生理难期阳德圣所尊菊篱黄未拆萸枝绿初繁【时萸尚青】
幽岵寡芳物离索谁相存白日照杯酒壶山落秋痕高歌行太清海翳开浑浑倚伏祥视履登
高倦跻攀化机何由息悠哉委乾坤

壶山絶顶望海

萦磴入苍霭断崖倚晴瞰天飈荡【阙】驶蜃气回瞩昏磐石偃危椒谷王浩无垠鸣交羣龙
战舶点微鸥翻浮云岌云朶悬霄浴霞根空浴东南突?【阙】日月门指数十洲翳招呼九仙
存余怀已瀼瀼前境方浑浑乘槎寄虚感微迹犹当论

登九仙山【仙何姓兄弟九人】

吾宗九仙人链药此山上渺渺嘉遯心乘烟一相访海门葱茏外山气嶒嶸状侧目明远潮归
霞委孤嶂尘缘误良契仙事敦夙尚何处乘鲤归微风起清漾

乌石山天王寺

天王小精庐山角临城闉古称藩服雄异境环相陈塔影六七枝瓦缝千万鳞烟明南台树潮
壮方山津老僧肯前揖似余异人人指点壁间画修庀行逡巡观音大士在维摩妙悲顰苍然
古木陰寒山砦可亲板扉几尊者一一皆风神老僧太息言刼余偶遗珍从今几年算此壁终
成尘余笑谓老僧子意亦良勤适见俄已失当悟无还真

黄溪口看白水

黄溪且缓程白水方迎赏石扇千余仞雪源数百丈幽光照天动寒气发地爽松杉含清英猿
鸟玩奇响仰视葱蔚中当得一席敞移家结香茅抱书寄泉上

访贡仲章舟行阻风

今旦始自信余生非数奇怀人发清兴欲雪成良时波响双橹澁滩寛衆帆驰危查立小渡残
竹悬断旗指浦见鸦合转蓬惜峰移深烟曲江磬微雨三洲炊寂阒有余适蒙鸿无定姿余宁

不可奈久与西山期

送人归临川

虽云有朋友音素犹难之奕奕大藩地遽得欢会时飞霰散寒威胜赏应前期高楼酒深注简
略穷谈谐但感人似雪顷刻合有离何当雪如云恒见堪相追雁下浦含暝川寒人去迟年华
委分首谁能计推移

雪中重过黄沙

环环磴屡折剡剡峰争回木阴与石浹梅花抱泉开长思黄沙好每待春雪来阳和发坤厚寒
霰失贞材引云贾余勇阴飈行新媒垂成一川雪步步当徘徊杉竹悬明冰琚璫递清哀丛石
动溪响叫吭出林隈含欣耦孤【阙】迎赏刈苍苔夙昔多亲友兹焉起余怀

早起

觉来日已升花梢禽语何许白浮萍池间散还聚起见梅已空夜来几更雨鱼行春到水草
暖香在露溪上人语喧樵薪满沙路

抚州魏坛观

何年女仙坛百步远城堞树色随春新飞花袭枯叶廊虚苔绿重帘静药香浹主人勉逢迎小
憩薄茗呷却读鲁公碑仙事公素惬是时中兴颂笔力泰华压此书最为小劲气亦矍矍大节
照古今片石即光晔人生果何为草草度尘劫挥手谢坛扉天长碧云叠

鍾陵紫极宫写韵轩晚立

择胜委清瞩空轩横晚晴遥屏散脉缕毫发分昏明沙鸟双复只林烟浊还清苍旻贮止水白
云载舟行接要居郡最翫奇尽天成当时写韵人此寄千古情招之不可得暮磬长廊声

洪都灵应观榜云径

厌烦取萧闲随意入云径上堂敲响板山童质辞令地寂室生凉体畅心逾静出门看木阴佳
鸣发清听风光匀可爱水色艳相映真契成自怡归路得新咏城市今滞留将无失幽性

新淦太平山

纵观不知远言登太平山诸峰卷秋雨日射风霏间悬磴折古石侧溪倒危潺金灯如丹红异
藟相斓斑忽怅经丘绝俄欣寻壑闲筠阴聚森爽樵人指幽关钟声出庵霭演梵作孱颜静者

足吾契语莹冰珊珊崖东野月上露华膏夜鬢松杉炯玲珑流飈过瑶环既静有余听焉知趺坐顽偶然在尘表非能悟无还

崇仁鍾山寺【宋乐史侍郎有诗在寺】

方看望仙雪仍访鍾山泉石限厄危溜峡崖減青天不知路深浅但爱山苍圆俄惊侈楼观一礼黄金仙衲僧喜客来觴行续茶煎仰视慈竹题俯吟慈竹篇前修凜高躅滋久余芳传白日倚山转倒暈千峯烟悠悠思难极且与樵风还

栢溪

林岭甚可爱溪源无尽时山花已乱发烟暖东风迟因与采樵者坐谈树陰移日斜自归缓我兴非人知

立秋日雨

律候秋序改午陰玄云飞惊霆发雄殷甘洒行空霏迸响下清镗激花裂明玕余凉泛匡床薄润通练衣草木转异色山川起荣辉弘敷三仪德燕及浮生微斐几乱书帙抚之有余歆圣言角相诡人理还多违山田秀加颖归息期林扉

壬戌夏五及陈宗元会于富州下横黄氏

蕙楼罢看雨稚綠新成陰流风淡欲留泠泠山莺吟美景天气和【阙】临情真语易契趣远领【阙】深上客贤主人蒲香酒频斟交欢不知醉讵计西日沉谈笑偶一时流传成古今毋为略斯集异世当追寻

河湖市岐山观与友人皮季武同游

旦旦望岐山樛木森山椒其下美清?仙真集萧寥佳友谢尘卢导余度飞桥危濺溅跳雪石磴藏灵飈探邃裂凝陰凭颠洞遐霄寒苍贯晴紫滉瀟峰壑摇久无登临适快此烦尘消日驭凉难迅人区亦非遥迟迟敢迷复亶亶同欢謡

丰城疎山寺

天气良晏温山原足游衍石溪试初涉衣裳费牵挽油油风力舒恍恍烟色远指峯左右赏爱草行坐软情兴俱笑谈造詣各深浅望望苍寒中禪关路犹缅

樟树镇五公寺

久幽厌拘维暂弛欣舒散近关得禅扉择步历苍藓沉沉松阴重灏灏水光远残花起余香乳禽响新啖虚廊清画长高僧坐谈简学室素所昧虑妄还自遣移晷始知归生烟满林晚

清江镇灵峰寺员峤亭

拔迹嚣尘区置身清凉境深深苍松林炎曦不通影松根得散坐肃然心自醒闲草膏以绿新蝉咽而警元非造幽邃已足移视听何当真物外无慙虚与静

重到山水村

往时山水村曾驻老仙策俄然二十暑重到高阳宅着书迈前闻析理发新益盛集天为成高情世难识繁余最疵谬每幸亲讲席悵悵俯仰间均能发须白山沈空外青川停雨余碧枿章悬旧阴莲荡起生色上客诂可期佳时凉难得亶亶后来人遐追抚行迹

送涂云章北游

奇璞閼伟器乔林长珍材国工久寂寞甘伏岩壑隈清庙九筵焕明堂八牕开良时难再得振衣起蒿莱流风写空江回舟越清淮直上到蓟门故人与谈谐所来非迷方咸?奏天阶燕昭称谊辟乐毅名高才区区宁足道邹剧何为哉六龙正御天走奔风雨雷奚待一孔荐自宜四夔偕素抱饰王度声光游江垓古来致身者不为云山怀?重【阙】垂芳在深培尚令王子困善颂端能裁

病起舒怀

常时不知老衰病遽见侵入喉饭若仇毒肠药难禁始终理夙彻羁旅情自深朋友各相念抚怜出真忱踰旬幸能起四体危嶽嶽幽舒雨新寄绿光倾远林疎篱上孤蝶石笋跳双禽油油好风来迎之散衣襟欣然若可饮清爽空烦心平生事圣学学定诂能任惟应委此身天壤俱浮沉

合皂山鸣水台

两山厄一峡几丈落寒水蜀滩春涛壮吴江夜潮起静听得天韵冥参洞玄理遽得还未能淹回成自喜幸兹有台亭绿?极清美霏霏林香生郁郁山光委本非尘土胸偶此一流憇所闻尽心闻我耳毋烦洗

持志堂苍玉轩

仙家葛源上空凉敞崇轩肃肃嘉?静泠泠清韵传轩中有高人读书事丹鉛尚友惟此君恍若物外仙循名乃綦贵比德渺莫言孚尹自旁达温润而栗然粹质生不瑕直节久弥坚风烟与

雨雪万变俱盛妍伟哉干霄志孙枝益绵绵尚令後來者毋忘淇澳篇

李氏淡香亭

清冷一渠水窈窕五亩园相携步荒径左右花药蕃好风飒而至语笑兴弥敦胜日得佳景占星讵虚言散憩一小亭繚以衆菊根岁寒淡香趣深奇难具论盛年值明世奇翮当高骞秋容与晚节豫订此道存林气漾华艷珍材美璵璠今夕果何夕殷勤属芳樽

刘崇正秀才金伯修高士自合皂山来访余樟树镇值大雪时余抱病病愈赋别

云凝雨不霑风定霰未先茸茸数素尘转转游轻钿万花开【阙】寂千林耀春妍景丽佳兴发二妙来高轩旅馆共清坐双璧映谈玄余衰得奇疾药鼎烦烹煎明明桑舆义尚友千载前念昔戴安道可以与之言胡为王子猷竟返中夜船雪罢洗峰岫归情胜剡川寄谢山中丹诀期相传

儒学提举司宴集

贱子久在野低头事躬畊堂堂贤宰辅胡为知姓名许辞庠序责复假宾师称仰既惭简书俯仍媿輿评公馆良宴会文雅有余清粲粲珠玉质嚙嚙鸾凤声深意修绠汲雄辨四筵惊我哀但多感一出宁非轻白日照天碧耿耿梅花明城南有归路西山能送迎

除日文江书怀

驰外心久息求安志恒违江受风雪压帆从波浪飞眄彼东山云妄行已是非为谁餞残腊荡漾不知归沉沉州郭暝黯黯烟火稀流坎理多悟孤睽情自微

寄题天光云影楼

城南有高楼楼高莫与齐上接银河流下临宝监开玲珑八牕境洞彻万里怀至人泰宇定灵根固深培不假日月辉长照神明台倒射屹不动幻翳要难裁初萌朝菌幽转作冥鸿来须臾忽变灭炯炯无纖埃冥参足多悟内定外自谐倚栏视下方此心良悠哉

知非堂稿卷二

卷三

[集部,别集类,金至元,知非堂稿]

钦定四库全书

知非堂稿卷三 元 何中 撰五言律诗

述怀

文藻风流尽天机定偶然自怜有今日犹复望他年道远云千里楼危雪满川春还有消息好
去到梅边

除夕

历象羲和远谁将旧恨新灯前数杯酒宇内几闲人豪杰悲来【阙】江山识故春今宵分两
岁看劒不妨频

正月五日吾族诸老儒服纵游

纵游二十士远赏物华新好是小兰若一来中圣人桃源在何处流水不胜春归路狂歌甚敲
敲乌角巾

又

山中忘世换人事又从新儒服吾宗老南冠故国人悲风千载泪幽谷一年春折取山花供清
香已满巾

又

有计能兴汉无辞可美新才名归後辈事业见前人野水孤村暮梅花万里春斜川同日月漉
酒正须巾

幽寻

意适可幽寻天空晓气沉鸥飞一川迴花落五云深庾子江南恨琼奴柱下吟野风吹我老鸿
雁有余音

晚兴

雁背霜花落吟悲兴自如天虚鳞甲动山老鬓毛疎断陇暮归客寒溪人自渔苍茫闭笼落正尔缓羊车

遗老

遗老今犹在方知有乱离为言前宋事曾见理宗时邑远何年到身臞独步危已无桃可种力穡赖诸儿

春郊

湖海独垂钓风云入短蓑燕来春已去花少雨偏多一饮捐愁却千盃奏醉何青山如有意对我独高歌

又

试数乱离年伤情更惘然牛羊荒草树天地老风烟白骨苍苔外山花野水边幽禽未栖宿来往自翩翩

又

归鸟情方远啼鹃泪未收渊明姑托醉老杜不胜愁云冷花无主山寒雨似秋江南春水足何处具扁舟

雨後晚行

太虚万籁动独卧一亩陰雨足归云远溪流到海深古今同此意天地一何心我兴聊复尔露花沾我襟

又

漫适闲中意应知事外情江山归钓影天地入笳声小市风烟合孤村竹树清眼中賸小景收拾即诗成

又

栖鸟黄昏後归牛苍莽间水明疑有月烟淡欲无山幽谷元非隐高人自喜闲徘徊不能去莎碧耿荒湾

伯父坚白道人挽词

昼静清江狱【临江録事参军】春调衣锦弦【知兴国县】去妖人共异息盗史堪传使节
临乡国郎星照楚天穆陵亲擢士公不愧诸贤

又

栗里陶元亮南阳葛武侯事功今代见壮志古人求短屐漫冈晚深衣老圃秋公心无可遯遽
往帝乡游

又

我亦公犹子公宁忍弃吾恍疑容色在还听语音无风急鸕鷀冷天清雁影孤九京良感激恸
哭洒寒芜

老圃堂雨

臯某不可复怀哉步疾藜江山宜有史风雨可无诗汉殿金人别唐陵石马驰物情犹若此公
意竟谁知

又

深谷紫芝曲南山白石歌斯人嗟已矣此恨果如何扇里薰风在花间暮雨多悲吟声已苦一
鸟下庭柯

喜雨

云叶来西北风声乍疾徐冥冥天下雨湛湛圃中蔬书传堪经世乾坤且负锄欲言无与领独
立看芙渠

雪

共喜轻堪玩宁知积更明陰凝两仪合势压九州平江海渔蓑乐山林茗椀清何尝不奇絶谁
望一朝晴

奇石

奇石争迎立青杉互引前泠泠两溪水淡淡一峰烟闲作题岩字时逢采药仙苍崖恐陡絶松
影一颺然

山中

何处征徭急兹山水石奇鸟鸣新叶长磴转断云移趺坐天正碧起行风自迟径穿松罅去巾袂冒蛛丝

微雪

微雪寒烟淡远村乔木平年登犹有殍政猛更闻兵乱水投陂急羣峯照野明酒盃无限兴诗句有余情

别罗士鼎

晚烟寒雁度夜月远钟微高韵非今世清评闭野扉始知千载上未与寸心违落叶荒山路独怜身是归

送喻道人归蜀鹤鸣山

社主犹无国西枝更有家早贪吴景媚今恨蜀程赊山岂东南异仙宁远迹差鹤鸣更须到方足养丹砂

又

缘重身真患时移事尽非蘧庐谁是住华表底堪归郢路雪霜苦锦江消息稀天长翅翎短休傍暮云飞

晓晴

一雨生春色千山起晓晴落花萦树转幽鸟过林鸣杳杳天如古茫茫世有兵开扉小倚杖沙上草初生

南居寺

闭户未从容出门谁适从聊随碧溪转忽与白鸥逢小雨十数点淡烟三四峯峰峯看不足山寺已鸣钟

饶州道上

新晴破积陰淑气泛行襟千里山河眼百年耆旧心霞飞沧海远烟入绿村深学劒江东者茫茫不可寻

又

手舂初歇杵麦粥午香知白酒村村薄青山处处奇
天垂双鹤远江渡一舟迟枫合东吴綠何人续楚辞

采山归步

松边采药去谷里带云归步转半崖侧影涵空涧微独寻茅宇歇因看水舂机数点山花落孤禽避客飞

象牙潭遇风

圆盖吹应侧东溟倒欲乾数帆将雨急万燕逆烟抟【缺】泪经频拭低昂尽自安还将长啸处双桨破空寒

病中感怀

多病他乡外孤怀始觉愁山围双鹭晓门闭一蝉秋遇合冯生铗勲名季子裘悠悠耦耕者端暇为人谋

梦邹明远时遇金溪杨方

心达形空滞神交梦自归江山真有待时命且相违君母虵杯悟吾亲鹤发稀殊方今夜雨偏向小窻飞

留金溪夜雨達旦有怀

忽见干戈动他乡隔老亲一牕如此雨两地未归人雁渡关山暗鷄催海宇晨谁能更敲枕聊挹曙光新

陈家源

恐是仙源里山从洞口开茅檐无客到稚子恠人来塘綠鱼迎日林清雀啄苔欲令幽赏足石道泝萦回

又

翠雾断崖侧丹霞流水西竹从幽处密松自古来敲落叶半藏路清风时满溪仙家元不远未许衆人知

龙池寺蒲石

底有贪奇意吾行亦偶然寻泉经絶壑看石到幽禅鸟语前林日鸡声曲巷烟偶逢樵客歇共坐偃松边

留文江久雨值水

半世长为客却悲行旅艰相知惟有雨四望更无山命寄浮沉里心遗生死间丈夫要经涉可复事安闲

白鹭洲

淡淡薰风度江明天影开竹陰侵水碧草色近人来诸老心犹在千年首独回非无李供奉却少凤凰台

甘咏之挽词

经传明精义图书贯大全曾为诸老敬不受衆人怜风雅力还古林泉清欲仙南州余此士北客识高贤

又

花屿风醒酒琳宫日度棋高谈千载靡浮俗万端疑柳暗西湖路梅残东阁枝篇章须烂漫知复寄从谁

又

独鹤城闉语声蜚到竹林安知名一世不忍负初心良晤情方切幽居病已深俄然隔千古慙恨泪盈襟

刘太博挽词

恳欵忧危国从容友大臣竟孤婴白志遂作绮园身名节非无寿乾坤更有人堂堂天下士何必画麒麟

又

妙悟通羣圣微言判六经千年遗此老四海失先生文字空传迹知闻漫敬名岂无房杜者犹足致隆平

又

如许龙门近胡宁忍濶疎不为终古别诟信此生虚未始壶丘学颇知扬子书向来香一瓣薄命竟何如

程揆管挽词

行意心追古材高道即师泽深三族浹庇远万间资苍隼须秋击甘霖入望迟东南此人物天意遗明时

又

偶奉亲从养因令季保城诟知求伟绩不忍毒苍生厚禄君恩重浮云世事轻翛然拂尘服身退更为荣

又

雨露深乔木乾坤启德门勲名虽尽幻施报始堪论四海天球在他年上蔡蕃门人更须恻奕奕久弥存

寄邹明远就问讯诸友

宴坐列芳植鸞声春雨余空斋三夜梦远道一封书能事身增病穷居计未疎诸贤日相乐我独问何如

聂氏丈人室

八尺床敷愜清平许客过堪容四翁隐颇觉七贤多山逼陰留席池藏水禁波此中惟可饮新酿近如何

送曾教谕之官万安

今雨深春色江花暎钱樽近看斜照下转觉校官尊山色通讲席滩声到县门金闺须布武六学始堪论

立秋夕作

但觉焦原苦何当沛泽流夕风微报响古木暗藏秋未事冥难测闲心远作愁乱山高下碧烟霭淡浮浮

雨余桂花盛开

搔首发清磬开扉啼早鸦西风一夜雨丹桂满林花老托心犹壮愚云识有加平生读书眼闲送晓天霞

次吴仲谷离字韵

一【阙】聊信意相遇若相期贱子方成喜先生便语离梅花迎客发山色待人知从此图经里应添所赋诗

送巡检之官柳州

转觉为官易皇仁贯地维更无方域限宁有徼巡时丹荔柳侯庙紫苔韩子碑弓刀多暇日烦为拂蛛丝

陈母姜氏挽歌

闺闼芳猷着乡闾盛德尊早为三凤母晚托八龙孙世有金銮美人谁琬琰存堂堂韩吏部铭碣照高原

槎溪

岸断风敲柳村寒雨病花妄心贪自适危路得长嗟别壑乱云散危滩归鹭斜平生谢康乐幽意满天涯

元真寺桥小憩

古刹传清梵横桥雨歇时年华流水在春事落花知宇宙遗陈迹江山本後期向来多薄命今日信枯藜

送人归临川

金河疎柳外去櫂响流澌为客有归日送人愁别时寒云随雁远南雪到山迟旧隐书无恙行藏莫豫期

絕江

挂席乱惊湍曾过此渡难潮归扬子晚山入秣陵寒听语知乡近忘年计日寛稳行随夜泊烟火满江干

登峨眉亭

苍壁孤亭立雕年独上时帆归空渚早雁落信潮迟烟火聯三郡波澜动两眉袁宏成絕响李白厌谀辞

鄱阳湖中除夕

除夕生能几谁无骨肉亲望乡偏恨路在远并遗身湖雪残波岸船灯独夜人淹旬须一到珍重故园春

行乐

行乐当幽赏晴峯带雪欹水香梅落处沙润草生时事识心仍累身添疾界衰深村红叶路樵牧转相知

辛亥元夕

顽坐故贪默忽行时自言寒沙梅影路微雪酒香村时序鬓发改人家童稚喧街头试灯候不到郭西门

送吴主簿之官石埭

簿领池州去开帆带雨微当令公事简见说县人稀云入九华碧雁惊秋浦飞丁宁桥下水官满载书归

赠李仲元

曾逢偏意悟顔面费追思把酒忽相语计年深自悲乱山藏路远秋水去城迟若到寒溪上教儿护菊篱

别唐仲谦

记名长似识相见始惭非每到极言罢却欣幽听稀日明山气改江静水痕归添得今朝别城陰空掩扉

水口夜思

牢落不成寐荔陰寒石矶潮生滩响尽海近夜凉归旅思随时进乡音逐遞非燕南与粤北恰是费征衣

山墅幽居好效穆伯长

山墅幽居好烟霞紫翠乡近窻皆水色通屋尽花香报曙啼莺慧惊春乳燕忙不须频谛视淡
艷小林塘

其二

山墅幽居好陰霏长綠萝地藏禽响异门掩草香多晓日明媒雉晴峰对牧鹅有时随野竖吹
笛小船坡

其三

山墅幽居好随人事事宜祝鸡行蚁尽乳犬穴蛇移瓶渾佳泉煮厨烟落叶炊藤香和棘刺扶
补便成篱

其四

山墅幽居好清【阙】托静深鑪薰太古意方册圣人心霄汉诗情到秋毫字法寻开帘散疎
嬾烧烬落花陰

其五

山墅幽居好花时不惜情前身曾作蝶有梦亦随莺艷得浑无格移来不计程每烦人客到指
点问何名

其六

山墅幽居好工持结夏规静扶枫本钓沉算竹根基【原本阙】

其七

山墅幽居好农谈到夜分侧林斜淡月遥石长幽云邻屋灯明尽砖炉酒气闻儿童催就枕露
点落纷纷

其八

山墅幽居好秋苔席月明伏龙扶甲影飞鹤发毛英河汉清丹极星辰淡玉衡残荷两三亩时
听箴飞声

其九

山墅幽居好加笏不外将帽纱梨谷露衣擎橘林霜醒妙疑仙教蔬珍共妇尝一竿元放手风席碧滩长

其十

山墅幽居好瓶储岁计终问梅经古刹看雪到危峰鲫穴寒渔隼鹭溪晓猎踪速隣相劳苦行阁炭香浓

读晦庵集

劫重魔偏胜言高俗每疑屈伸应有待真伪竟难知烧烛成花处看书彻卷时嫩凉秋满院虫响起前墀

吴仲谷来喜雨

山居难适俗到县动经年偶出成奇絶相看各粲然酒深孤菊外灯淡小楼偏草草荀陈事他时倘有传赠吁江黄季与往宜春访旧识孔知事

此地忽相见惊心十载期未询行处事先说别时诗小市见人喜北风征帆驰如何不覵驻总是旧相知

牡丹

异锦星孙巧奇云梦女神珊瑚离铁网翡翠糝金尘天上花难并仙家画莫亲如何元化力独酿一根春

除夕

我有百除夕蘧庐是处安翻因归路近始觉到家难浦隔雁声落篷孤灯影寒家人应共说宾阁尚盘桓

五言排律

节妇周母鍾氏挽词

毓德推闺秀来嫔盛壺彝诗成自誓日孝尽立孤时被教三迁早娱亲一檄迟里门人共式汗简史应垂燕喜高年集情深爱日驰丹沙蓬海浅绛节婺星移松柏【阙】龙近风烟过雁悲
区区刘子政仅就挽人词

陈峭轩挽词

良璞未有识需时为席珍浅清沧海地齐汨吕梁津桂楫以前溺【阙】杵入至神千金何啻
鲁六印不酬秦瑶圃花光曙麟洲酒影春青鞋天地阔绡帙古今陈遇物聊施爱於情每以真
百年椿岬岬四世玉嶙峋盛德谁与让能言写未亲仲弓今已矣碑版属何人

陈提举挽歌

虞日来仪凤周郊早畜麟方推王式化已客马周身事合符休运才猷接近臣东朝深雨露北
极上星辰倬直宫闱密官箴簿领勤剗繁苏剧县决讼讦豪民余事修班序高名动搢绅奉徵
资筦库蒙冶剩输银计日堪经国知年急养亲才酌三釜志遽造九京人陈寔家声在吴兢史
笔新徵铭宜状实痛诔最情真秋雨昏山色寒烟黯路尘苍茫幽窆处哀挽竞伤神

梅

奇植遗山泽英姿照古今醴薰贯三极贝色表千林年运神孤王陰凝力独任太清涵妙影元
气托芳心薄雪村村淡轻烟涧涧陰苍茫何见晚邂逅却愁深南纪开春事幽情寄碧岑自怜
余短策相对发孤斟

移菊

仅得林间趣闲寻菊本移人家深竹里枫叶夕阳时汲井浇畦润将锄下手迟护丛愁蕊损带
土怕根知每被归樵问深怜冷蛭随寒香生径术幽事补湾碕斗柄西北落雁声霜露垂裴回
绕丛畔自笑可能痴

寄程承旨

元凯同严召【阙】班锡异恩圣神思治切宗社有公存地立鳌峰峻天依凤阙尊臯夔侔道
合旦奭共心论【阙】干时雍化丕扬祖烈敦尧文严大典虞采倚昌言卦气丹凝鼎星符紫
照垣奇龄归硕德宝历巩皇元花竹蕃三谷云霞焕九门相望清昼永朝下酒盈樽

皮氏逸亭

地僻藏吾逸随宜托数椽池新何许水枫寿不知年竹让前林月花归隔浦天彩麟孤镜照幽
湄四窻圆曲几清时里闲心太古前入因添晓起出每及宵眠句得思仙寄棋高许客传乾坤
余蠹简勋业老觥船智有过荣计先求胜祖鞭大章短东极夸父恨虞渊世共称工者吾知付
莞然他时耆旧传应指某公贤

黄体元别业因梁为亭范德机榜玉壶水揭曼硕赋古律余赋今律十韵

何处来奇璞雕鐫締构工置之孤屿外渺在十洲中石色摇晴雪林辉贯夜虹贪寒龙伯到爱
洁鹤仙同拂席柳陰綠繡书花影红盃增玛瑙莹帘讶水晶宫可倩凌人守休令喝子通疑神
尘自远比德日应崇橘窄堪容隐壘清亦策功试言蔚宗辈好为传壶公

送伊拉齐金事赴南台

英簫来江右人归水镜中豺狼当道失麟凤在郊容玉尺严於已金钩听以公龙沙方集雁乌
府遂乘驄不逞评弹巧惟恢宇量洪列城瞻朗月南夏洒清风江漾檣竿采天摇酒影红若为
谈去住犹未远帡幪紫极星辰切青冥雨露同遂知秣陵水直与析津通

送董方达赴广东

与计曾偕上承恩列校官党庠为长易藩府事人难秩幸三年满朝无一迹安要荒乘远障巡
徼谢儒冠行李书籤减严程水驿寒庾梅留雪待韶石带云看历历多奇境层层下激湍山藏
蛮鸟怪峡束夜猿酸潮上雄都近烟希小市【阙】蜚人行猎熟獠妇挈瓶欢俗险平为贵民
疲猛易残长教榕?綠莫恋荔林丹善政宜无怠清名自不刊九重求士急一旦在朝端味勿贪
珍异衣唯称袷单好成南海【阙】归櫂候江干

寄题凌氏横舟阁

世有要津路居当野水浔千年济川事一片渡人心天地【阙】蓑老风烟弄笛沉岸花时自
落沙柳坐成陰舣棹堪谁待临河有叹音行车常自尼吾识固能任人物多豪俊江山几古今
巴东奇杰句为尔一长吟

知非堂稿卷三

卷四

钦定四库全书

知非堂稿卷四 元 何中 撰

七言古诗

与甘东溪

风吹岳倒黄河倾汉家老死飞将军洛阳宫门铜驼哭哭声遏尽南征云忽忽五马归何处吴山楚水相吞吐英雄豪杰笑杀人新亭挥泪中流语佳人别去吴王台空余旧曲令人哀往时射策谈江北夷甫诸人安在哉春风吹老千桃李短笛凄弦风雨里荷衣蕙带漫逍遥杜若洲边雁声起君不学少年快马曹景宗步逐狡兔弯强弓君不能少游欸段居乡曲得称善人【阙】

何悲辛强把哀吟感鬼神高堂梦断行云杳双

蛾翠黛为谁春华阳雪落江南暮江花江草蛛【阙】露人生何处无知心背人鹢?双飞去为君起舞为我歌古来贤圣良蹉跎区区离合若为动罗敷陌上感慨多山中仙人最高洁不比常人夙葶血愿君举似经畋诗今古何曾异明月【经畋有山中仙人歌东溪常称之故及】

汉宫春

君不见汉宫六六多佳丽露花半染云裾翠少翁招得夫人魂孤鸾夜啼月波坠赵家姊妹专风流双蛾不识人生愁夫容并蒂欹一朵西飞青鸟徒离忧飞龙翩翩上天去云幕椒房土花雨堕腻埋咽恨未消香魂尚寄寒荃舞人间炎日焦衆芳肯随葵藿来倾阳柔情幽怨透地脉烟帟寂寞强成粧谁吹旧曲缘云切寸心婉婉应愁絶緑罗几叠御赐衣红绡半点守宫血凄兮媚脸栖余妍遥忆羊车望幸年至今一片巫山雨化为飞烟空潜然故家陵苑孤云外緑树如云草如海殷勤唯有虞美人同向墙陰弄晴霭

春怨

洛人倾国赏牡丹东家綉轂西家园黄鹂紫燕新得意柔云如酥花迷魂游人寂寂归何处花亦年年占风雨江南却遇李龟年苏州空感杨开府谁吹玉笛断人肠斜桥浅浅流水香惟有千年老铜狄看尽人间几夕阳

又

天女手剪五色云鞭雷控电行青春散作江南万锦绣烛龙眩转空无尘燕儿眼寒心更苦吴娃情酣梦无据依然锦绣化为云却恨风来挟云去十二楼边芳草多知今鸚鵡听谁歌千金买取新丰酒地久天长奈乐何

读罗时翁燕山行稿

去年送君万里行英雄气富乾坤贫今年君归未会面燕山行卷惊倒人我从江南想江北八陵草暗孤云白夜窗灯火读君诗一段奇愁贯地脉燕山山水负雄奇千五百年君有期荆卿等辈了不见咄咄怪事令人悲黄河西来走东注太行山高压中土河山壮观帝王州万雉城荒土花雨宣和玉辇去无踪萧条艮岳摇秋风东霸城边见铜狄广武战处思英雄天地空荒形胜老儿女终身不能到北征诗後断无人骑驴独向长安道长安道上新丰徒怪此却与南人殊天下久无快意客此客乃尔雄牙须即事非今亦非古牛鬼蛇神万妖舞千里万里种奇语要与嵩华争步武人间官不直一钱归来添得诗一编堂上称觴拜亲寿膝下读书忘岁年要狂即狂已即已丈夫做事当如此何由相见共君谈寄诗问讯聊复尔我今山中一处子沧洲沧洲天下士【沧洲时翁自号】

用欧阳文忠公神清洞韵题罗士鼎所藏米元晖神清洞图

颍阳之山翠烟深仙人不见劳我心藂峰峩峩照空廓白云欲飞石欲落此中不着人间客采药归来花满石想当飞舄堕层崖数声清啸惊瑶台羣山苍苍今在眼举手招之殊未来颍阳之山夜鹤飞仙人不见归何时神清之洞有幽客应向洞中煮白石洞前岩下仙家春几片落花杂飞溜高下楼台缥缈霞緑树不老青山壽王生邢子意殊勤恨我隔此浮空尘安得碧云千万叠栖此人间谪堕身

又

元晖昔作西江客夜飞墨花晓无迹春风留此二百年幸是山中至人识有千黄金双白壁鵝溪白鴈才数尺颍阳山高风露寒几处高堂挂生色

题曾子文靖节诗注

一马东浮南北分吴宫桃李春正喧英雄慷慨有余恨誓江直欲清中原五山忽拔神仙宅长风吹转铜驼陌乾坤千古此哀新琵琶有声言不得当时紫损君黛眉意欲恤纬终投机山能平地心非石宾王从此自緇衣夜看五柳先生传长恨斯人不吾见难将逆裕追春秋此身不是甘贫贱十载东篱一世豪君今蹊此清风高零陵哀愤从谁语心不与契安和陶槩本无声亦无趣悠然忘返中情寓一编笺出许多愁奈何此世非刘裕杜陵正值落花天江南又见李龟年伤君曲调空辽絶吞声独咽山中泉

中秋走笔

忽忽不知秋已中起来望尽江之东天风吹上一片月万古有尽明无穷自歌自酌自起舞失喜堕在明光宫须臾见云不见月九州之外俱昏蒙我狂絶叫天何聪乾坤如此宁忽忽江流冥冥上有枫云边又叫南蜚鸿有酒且醉无酒可有月不与无月同丈夫意气见石裂直欲扫裂云皆空低徊一笑良自悟事与变会谁其逢仰看云月勿复道西风落山人睡觉

塞野纵目

读书万卷不经济懒境最佳工坐睡手持绿玉信步行穿破麦花到松际紫田空谷含幽光隐映深松发清吹北风掠野牧者谁牛影参差霜草悴一牛闲卧意方安童子何知鞭已至回头一望近天南高下千峰洒浓翠近村远浦合寒霏落木平林归暮气世工善画贵逼真悠悠真境谁能契古来文章亦如此真处看来有深味竟为幻语欲幻人敢向人前辨醒醉归来归来勿为留幸有禽声媵鱼沸

道傍湖中小白莲花清香可爱野人名曰玉莲

浮叶团团缺一角开花皎皎玉新琢洛神湘妃不足伦太白醉魂寄萧索过客谁能知妙香春风奇稟劳阴阳可怜有此白玉质谪在江南苕藻行古来名花倾城国绿珠楼下沉香北幽然更用世人看摇荡平湖水天色

高困四时歌

春风东来泛幽谷出门一笑人间绿新雨池塘柳带莺嫩云洲渚沙眠犊一蓑一笠东西村天高地下斯人存归来醒醉聊随意翠树无言花满门

又

阳乌炎炎焦九土老农吁嗟气如缕山中神化出移时一片闲云半溪雨谁家金谷有凉台葵扇桃笙争自媒清风却在长松下不须用智不须才

又

杨柳矶头天万里长笛一声风不起翠洒千峰日映烟清涵双涧霞通水季鹰底事却思归岂是鲈鱼轻别离晚知尤悔又何益湾头钓竿君好持

又

寒鸦万点落叶赤山风萧萧野日白池上梅花俱有情林间茅舍元无客人言梅花知岁寒花亦偶然冰雪间向来羣芳今欲尽兰芽已动春将还

宿紫玄洞天

闲招双白鹤驾我吹玉笙去谒紫玄君
飞飞入青冥石古天风吹不剥银汉残波崖畔落
万年碧树春长花花间弭节听天乐戏拈北斗柄
细酌瑶露团八面烟霞沧海曙四垂星月碧天寒
珊珊晓佩人间去万顷飞尘入挥麈徜徉九县卖金丹
邂逅千秋人未度

罗士从真一酒歌

大槽压白流醴泉小槽滴红血啼鹃多夸妙味觞玳筵
讵知毒留不可湔工调锦瑟思华年薰风阜民才五弦
法吏廉洁终申韩关雎麟趾意莫传岷峨之山来坡仙
鞭鸾驾凤嬉人寰黼黻王度勲柱天余事与酒究本源
坡仙仙去今几年真一秘法空遗编余顽居士何曾顽
乾坤万事俱精妍冥参真一忘蹄筌高【阙】麦尘霏玉
鲜渊明秫颗珠明蠲幽涧汲月分清涟水火交济陰阳全
三投酿令味温妍甘芳周彻客流涎杜仪足蹈舞九原扬
箴刘颂俱浪言皂隶八仙奴七贤持浇朽骨应污顔东风
吹緑花盈川泠泠鸞吭韵清圆此时一酌神超然至和气象
身周旋顿挽淳风追古先如此无怀大庭前回视楔薄吁
可怜若真若一物何难甘为弊法相牵纏治道贵简不贵
烦为君长歌真一篇

墨梅

咄咄喑喑夥奇哉维摩引臂何方来忽而玄云飞出老
龙黑黯之鳞甲乃是皴皴不剥之枯苔三桠两杈铁作髯
十点五点小者如珠大者如雪踈【阙】惊失正视似龙非
龙徐看画得蜀苑吴仙梅梅花江南【阙】童亦指点毫发
不相似捩弹舌闪闪燕山飞雪飞无时【阙】贵梅一枝安
得韞材二百五十疋烦君多【阙】短幅【阙】火室

赠陈仲实

春风吹空雨溟溟【阙】绕几帘不卷燕子【阙】湿衣花
草生客来【阙】数口亶亶撑眼直【阙】睨傍无人醒我
萧条【阙】不齐须臾反覆渠得知马前之奴忽极品【阙】
贫中富贱中贫金谷楼下花满园不知仲蔚【阙】印堆床
十九枚不知败絮牛衣那得是子陈还是【阙】车如流水
马如龙相逢好为细说少年行

寄题疎山寺半闲禅房

往时沿沂盱母川李花陰陰曾系船丰茸沙草取幽径扣
关一礼白云禅千柱空廊絶人迹苍苔乱点蜚红妍松香
四袭翠滴雨江影半侵明暎烟鸛鹤流声出岩谷轻霏忽
散风锵然长哦欲写不能就每寄清梦时周旋秋风吹空
客如仙名山有记时相传迺知昙花解重现弹指一瞬五
百年经阁香台雪几春戏成小果留人天先师吾乡白云
寺卓锡尚令题榜鲜半闲之半可着我呼童亟办青行纏
身前旧境余一念定许邻舍香茅编

别高申伯

江南浩荡春风滑信意南游可奇絕神光直射瘴云开陆贾先声到南粤南粤堠子一千六百里春风却在梅关里关头饮罢卓锡泉前迎无限佳山水最好望韶亭上看三十六峰太古之色拂天半恍若后夔骑凤从天来带得虞庭九奏韶音回此时彷彿闻之应思虞舜不忍去唯有山风海月相追陪舜峰之下韶阳庙忒心馁魂何足吊卢能远矣莫问曹溪禅浚阳峡里不必听妖猿直下广州城中去城中公卿多自贤医官酒库亦是官善事使长官无难此心不与物俱转三年偃息人已安着就新书不妨似陆贾若论功名正恐陆贾出君下林间荔子海中鱼瓦甌酒醒日日沽千岁之枣安得长相寄人来时寄广州书

送皮德昭之官武林

羨子才如渥洼马万骑嘶风俱在下霜蹄如电不足飞天上良星愁空靶如何不归十二闲远放江南沙草间一朝驰入东吴去去看锦绣旧江山故宫土花无点碧骋怀流水谁移得万古乾坤万古空英雄无泪可轻滴回首一百六十年闲将议论当筹边诸公何恃恃江水江水解容偷渡船璧月无情琼树老遗恨满腔不能道留连一曲後庭花待得杨坚何草草海门自辟潮自来礼华乐叶俱寒灰东风渐摇堤畔柳陂雪欲挹湖边梅平生欠作经行处羨子东行问征路一官何用计崇卑好听吴侬诧新句嗟哉与子如有缘相逢相别不期然龙杖堪骑定相访马塍花下酒如川

郝思温大字歌【号东山雪庵高弟】

东山手提雪庵笔笔中出此万钧力重如岱岳镇坤维奇如古鼎跃泗侧点如沧海之碣石直如参天之古栢曲如老龙恣盘拏横如方城立鉄壁快如大泽斩蛇劒妖夔幻魑俱辟易巨灵引指太华擘三千狮子座举臂可移得偶然挥毫【阙】世间世间壮士不能掷瘞鹤铭摩崖碑後来者谁谁繼之我尝见龙溪之字大如箕五百年间无此奇雪庵老东山子优鉢昙花重现世崑仑以为笔东溟以为砚青天以为纸为我写太平两大字持献天皇九九八十一万岁我歌尔字我老矣

题江南烟雨骑驴图

风发发雨潇潇渡船未度山相招骑驴不知前路遥前路遥抵何处南山之南且稳住莫向长安街上去京尹今无韩吏部

送朱县尉之官蕲城

秋风吹船上重滩前茅未到声先传官能捕贼如捕鼠直捣狡穴不一全上功得赏来此郡威懾犷悍皆服田城南城北雨新足香稻满野歌盈川衙空吏瘠弓力废寻常旧业开芸编鬱孤台高俯流水崆峒山碧迎寒烟张梨如孟柿胜蜜美酒可饮不直钱茶山诗派有续者随时倡

和多新篇圣朝无烦上封事第一莫学吴门仙方今儒臣易进用九迁何用终三年

菊歌

山水之村沙路乾风清日美情闲闲松林公子好事者千株异菊培庭间素娥天孙娱清夜从以羣仙彩鸾跨尽收四天五色云巧粧絶艷鬪新雅红玉琢成深浅红赤金抽瓣金珑 推水妙手簇冰蘼间以孔雀堆紫茸洛阳牡丹杜家谱西园芍药何足数造化工多良独难逢花不赏将何欢君当歌我当舞花亦欣欣欲相语不须定限一日三百杯不须腰鼓百面如春雷但愿樽中长不竭诸公长在花长开世换花花换世移根改色年年异一番花樣一番奇看到伐毛洗髓几番时

送程学士

洞庭之水银河通手提白笔行清风归来緑野按幽事青山低昂马影中时从宾客娱泉石不省麒麟谁第一中使传宣下九天关河秋光照飞驿彤庭引见宫云开问卿安在今肯来【阙】 映天顔喜百辟在列俱首面皇元经制率九有曾侍先皇讨论久登庸耆俊徵旧闻宗社灵长自天佑中书堂中庶务清四方万姓歌升平应无阙事可商略定见房杜藏功能我从诸生立门下别公敢把深衷写子房归计未足高伊吕元非退身者力竭忠嘉荅主知【阙】 此东南谁当续王庭石介颂眎千万祀无穷期

鲁港行

【阙】 西来天堑长大波如山险莫当黄芦未花秋黍熟欲吊【阙】 空苍茫十六年间老师相格天勲业伊周上仪真使容【阙】 襄阳将军尽降将西园价积郿坞金伴食光禹趋雄禁法宫穆清坐高拱赤舄雍容衆口瘖葛岭祥烟笼甲第吴娃理曲争新媚珊瑚枝边酒影春水晶帘外花香醉主君千年万年计甲光如水边风寒虚传奇士画三策临危讳病医良难古来何限韩擒虎天马如神解飞渡出师拜表真孔明不计【阙】 九节度半闲堂前杳归涂合中诸客今何如前时晋公魏公语今日驩兜苗鰪书残月无情上阳晓木绵破【阙】 闽山道潮落潮生人不归陌上花开几番好

采石

惊涛万里来无极虞公中兴偶成绩百年俯仰感慨多事不天假终无益君不见李太白高才絶世何不直但令供奉行醉墨仓卒才为冰玉容万里漂流夜郎谪人生有知当自适飞絮浮云本无碍青山丘墓何足惜向来金銮殿日落狐鸣秋草碧

车碌碌

车碌碌车上行人雪中宿三更驱驴声陆续顿撼肝肠眩心目霜棱飞刀风激簇荒邮无烟抱

空腹橐驼不收马成簇暗里低心避羣牧望断海光上东旭木末天低星煜煜

黄河道

黄河道漠漠黄沙覆枯草依然南北两空堤堤上畊人长桑枣人心百计当若为古来河水今南移平原县前好沽酒车夫鞭驴莫回首

龙湾阻风次日舟人必行解舟风回喜赋

东风吹船行西风留船住蓬松黄头郎作底使风去芦篷两扇当江开船船相趁风初回龙渊烟气隔洲失宣化山光随棹来潮头又上推船走一时便过新河口两人胜负篷底棋船行迟速人不知黄头郎稳扶柁信风宿大信肉色花枝红采石酒波春水绿

长风沙

长风沙酒旗斜风沙有情留郎住劝郎莫向前江去前江去转风波牛渚圻边须过得皇天荡里奈郎何郎船但系门前柳唱曲好歌劝郎酒与郎不是平生亲怜郎却愿郎长久郎今必去当何为教郎解有思人时

山礧礧

山礧礧石确确一滩翻下一滩恶青衫黄帽扶招竿鋤锋如戟波心攢打桨失手能荡过扶竿失眠船随破三山城中女如花高楼酒贱多鱼鰕荔支林中寻屋住上滩难转莫归去

冲虚宫景真堂

怡山东麓堂静深欲寻真景真难寻华钟时发贞明韵【王审知时】秀木递悬天监陰【王伯梁天监中飞昇】天风飏飏吹余发戏绾幽藤作条脱骑凤箫惊乌石云降龙劒照古山月丹炉药竈长周旋六时采撷三芝鲜蓬莱书札失幽约几度归潮深碧烟

了娘囡

了娘囡西禅寺里粥鼓鸣殿前殿後荔枝密叶落当扫草久生衣裙洁峭苔鉏轻戏将苔石门敲铿廊陰同伴笑相谗话字难通知有情绀园花香日易晚行童迟打昏钟声

古秋夜长晴雨

壁带悬素槩冲牙起瑶林月寒文螯百虫语帘外桂花香雪深綉茵暗辍双龙枕纹笥密收团凤锦西隣少妇笑齐眉宝帐芙蓉携醉归独自佳期长是误璫霜欲下雁惊飞

又

雪浪流碧虚雨花散前除西风红叶石栏曲尽并寒声归绮疏回文读罢双蛾敛城上啼乌稀
漏点东家娇小乍迎郎沉水银篝残晚粧灯里镜台闲自照红颜相似夜偏长

题卢鸿十志图

崖欲脱峯欲飞水洒洒烟熹熹石间老树不老色翳萝悬陰石入黑调槩未了趣观泉十处奇
踪日相迫紫虚万里丹霞开直上倒景之高台佳云好花满嵩少仙友为我今归来莫嫌登山
脚曾踏东都路姚崇宋璟可人故不然岂肯容易出山去

拟岘台

拟岘台山如盃树如苔台前东风花乱开流云藏雨花间来花根得雨新緑催花枝随雨成香
泥神工鞭策不停手七尺容形争好丑桐林领头木香酒百钱一盞当酤否

雪中度崇仁望仙峰

游乐之溪清可沿天风剌剌山盘盘愈行愈深愈幽邃疑有仙者栖神丹樛木怪藤鸟鸣苔緑
潭青壁龙蟠蟠徘徊赏爱不能已步步驻目摇荒寒寒云平凝帘帷妥急霰乱下珠玑完忽而
两崖苍苍散花雪板桥石路浮 乾交迎密扑迷欲眩怯下疑高行自难凭涧茅房所居雅叩
门烟火相依安澄渟夜气造宁极婴冒晓冻迫殊观忍触珑 纵健踏喜聆环朗藏鸣湍垂蕤
不动偃杉竹悬柱偶脱争崑崙前源未穷取危磴直上百折陵漓岷新爪痕痕过饥虎高翰叶
叶游飞鸾俄然独立倚霄汉波涛翻海熔银寛双瞳四彻洞万境肯与尘界循忧端蹇余看雪
知几处何如此时望仙峰上看仙之人兮来不来浩浩元气与我同朝餐

题五马猎归图

秋野肃肃秋草萋萋天空雁度呼鷹时一马前行四马随前者回顾相指挥最後两人俱下马
一人拱手俯听之一人挈轡毛色肥角弓在弣箭在房人马意态何迟迟知从底处射猎归莫
是营州少年并州儿闲中貌此知为谁笔力精劲妙莫窥我疑此画有似汲冢古书出蠹简残
逸有缺遗不须完足自可宝古人日远何由追呜呼古人日远何由追

黄氏南园歌

南园花南园花白於雪红於霞深处定有仙人家花陰乱驻七香车山香尽舞花不老花艷直
上摇金鸦琼膏一吸香入骨醉呵金鸦不令斜南园竹南园竹寒於冰緑於玉割得何天土一
丘炎官虽炎谁敢酷天山太古雪皎皎蓬莱絶境风萧萧白鹤翻空啼一声下占清陰对棋局
君不见古南园锦茵红皱琵琶弦珊瑚碧树沉水烟嘉宾列坐鼓咽咽白石诗句吟成编放翁

记文笔如椽挟策博塞若为贤抚掌一笑睨青天不如花竹之间汲清泉且取粟粒香芽煎

题五公寺壁画古栢

陂陀堆厓挺双栢槎牙直上不可计寻尺元气所融结通身骨力丑怪形状古黯色作柱擎天
等闲事世间万木俱难敌栢根水流滔滔鼓舞风雷吞吐日月【阙】
惟有双栢牢万牛回首参天高看得孔明事业如鸿毛

由宝塘舟行至临汝

卢鸿十志看不足爱雪贪行雪相逐晴风吹散圯山寒三十六陂水初绿黄洲拏得罩篷船松
筠撩遶烟成渊波声叠下滩声恶鲍照却歌行路难

山中乐效欧阳公

东方风回春山道趁暖行歌霁华早溪源露歇逢药苗石径烟轻掇芝草红英洒地燕将乳绿
树添阴莺未老入客鱼鰕朝赴饌倾筐笋蕨夕供芼山中之乐谁得知我独知之来何为水竹
沙头闲检校村村箫鼓太平时

又

堤柳绿摇新罨画石榴红摺娇裙衩莲荡风闲翡翠敲菱塘雨定鸳鸯下溪女浣纱朝出村行
官饮水暮归舍瓦瓶手挈隔年醅石下坐围明月夜山中之乐谁得知我独知之来何为空里
乌蟾飞影过桑麻课效胜书帷

又

空山一夜生新雨凉起赏心千万绪扇团自守不依人桐叶知几寻脱路隔陇笑谈杂樵牧临
流宾从惟鸥鹭悬庖芦菰美胜酥精淅新秔香满户山中之乐谁得知我独知之来何为青林
红树人?湿护得金橙密处垂

又

千花重作阳春节野杏山桃随处发莫思前度看花谁已见新坟芳草歇穆山山下数湾月华
山崖千丈雪幽人独在雪月中要与梅花成四绝山中之乐谁得知我独知之来何为除却
山家新腊醞世间无事可相宜

龙雾洲【时大王有南行者】

龙雾洲水油油中有驿驰南越舟庾岭瘴天云不收直到海边天尽头天尽头海茫茫金珠璀璨平斗量鸿毛性命此难忘槛车何事招巫阳不如回雁峰前鴈鴈门旧侣年年见

陵山馆辞

陵山兮苍苍仙之人兮何乡遭余陟兮巘嵒援碧藟兮回以远草髣髴兮华缤缤颐下方兮凝翠氛空馆兮延伫待来不来兮杳空碧七鹤驾兮曷追渺余怀兮悱惻煜三秀兮洁餐羌静贮兮陵山挹太清兮抚玄极聊逍遥兮永终日

知非堂稿卷四

卷五

[集部,别集类,金至元,知非堂稿]

钦定四库全书

知非堂稿卷五 元 何中 撰七言律诗

与胡山村

九万风高力控抟偶然倦翼堕尘寰间闻说到乾坤外知己谁当伯仲间何地可堪容一橘乱云相隔失三山方来亦有无穷在未必先生可得闲

又

平生再拜一何难昉得陪从杖屨欢大节熟闻诸父语高风还许後生看茶边道义松风昼酒外兴亡竹雨寒别去几时能听法秋深桂馥重凭栏

送李仲章远游

风笛无声笑指空出门谁碍更求通一帆千里客何远王气雄图江自东赤壁惊乌飞夜月衡阳看雁落秋风人间兴废不须问诗在江潭柳影中

秋怀

万壑东归昼夜流人间自是本无愁不悲白骨塌秋井尚恨华屋归山丘此事直须一杯酒只今何用万里侯明朝且可寻黄独荷锄径往西山秋

又

采采苹花可佩香依依橘柚未全黄人行塞北非征戍雁过江南有稻粱短笛疎钟来别浦乱鸦飞鹭共斜阳西风扰扰知何似看见黄花满地霜

岁菊

黄玉为装好自修天寒身被翠云裘直於岁暮标明节那向人间立晚秋湘泽忠臣终恋楚柴桑处士不归刘漫将二老闲题品寒照疎篱一片愁

除夜

身外须知总是空书生何处覓穷通自缘一岁今宵尽独坐残更数刻中学有浅深心勿画诗
无今古句难工不知春到池塘未一夜檐间花信风

閱穆陵丙辰御賜進士詩

後代忠臣擢丙辰穆陵魂斷北征人長江浩浩傾吳越九野荒荒嘯鬼神鵲血縱乾難返蜀烏
頭未改竟留秦琵琶絕域千年恨青塚黃雲不識春

大水

漠漠陰寒寂寂秋濁波如屋蔽空浮聚灰莫試媧皇手銜石虛存精衛謀逝矣棟梁歸大壑累
然盆盎塞中流鸕鶿聲苦行人斷且向江頭具小舟

雨中

雨滿寒空風滿林閉門十日自悲吟不知 袞從誰語尚許傾陽見寸心書史軒窗雲氣潤蕙蘭
蹊徑蘚花深好風為我吹晴未欲釣清溪坐柳陰

又

炎夏如秋氣已還老天奇變亦多端山橫北牖陰雲合人對南山暮雨寒江海窮居無米易古
今邊意得詩難岩花落盡幽禽語坐看千林擁翠瀾

八月二十八日

黃竹哀歌世偶傳佳期應待後千年曲江宮外看蒲柳凝碧池邊聽管絃古往今來人化鶴天
長地久帝為鵲蓬萊水淺應聞似徐福歸舟已失仙

夜立

冥冥無復辨秋毫天映諸峰涌翠濤萬里明河流眼去三更獨雁倚風高南鄰絺綌秋難貸隔
舍歌呼夜更豪只有殷勤木上坐共聽枯葉响蕭騷

臨川道中

路隨一水曳長烟秋入重雲擁亂山過眼向來華屋處寸心不挽盛時還紛紛世故行人亂漠
漠林霏白鷺閑忽遇長空飛驟雨春泉一派落松間

穆山書事

螺虫三百有六十其长相残更断魂细与渔樵商世事独寻【阙】梵到松根蝉鸣晚日浓时
树鸦落秋烟淡处村难覓飞车游海外直随藜杖信乾坤

晚步

欢适常看好景稠悲吟偏觉满空愁碧云忽作红霞合翠靄俄成紫气浮笳紧山城鸦翅乱人
归江路马声迢老天遗我多奇变着在江南泽国秋

晓晴

雨意将阑天自休细穿诘曲听鉤輶千山欲曙微霞吐万木含春湿翠浮孤塔远知城尚近空
江犹似古来流遶汀花落白於雪掠地风来严似秋

孺子亭

先生不是早知机所恨诸贤喜有为共立名称空自异竟成朋党最堪悲当时仅许陈蕃识此
意只应梅福知亦见祠边丞相宅满墙幽草緑参差

登滕王阁

洪崖山前树历历石头渡上烟漠漠龙分片雨过秋水鸥倚西风窥断城吏部文章余简册前
王名姓老图经登临已费三十载草草忽令诗句成

次韵彭希爽吴景传约游穆山

穆山祇在白云隈攀石为门任去来两涧寒声通法席数峰秋影上香台林深僧梵含风远岭
隔山樵戴月回此地能令高兴到中秋又近桂方开

兴化军冲虚宫赠陈虚一尊师

兀兀山林栖遯身洞天深处振行尘客如种放岂樵者师似弥明非世人丹水汲余山月淡异
书评就海花新他时说看逢【阙】事皇庆行天第二春

舟中

远送孤帆波渺渺深笼寒靄树稀稀象牙潭上风初急龙雾洲前雪乱飞山掩孤钟分响到沙
盟丛雁逐行归雕房炽炭行时令何那痴渔拥断矶

黄氏石阑

此地何年石作阑石棱不共薜花凋四时胜日围芳草一坞春风护牡丹洛社赏心遗记在善和先志旧书完明年一鶚清秋上文石斑高万目看

谕仲本诗集

蛟室成绡别是机向人定价每疑非寒通海底珊瑚树秋漾天边宝劒辉虎瑟含风苍洞远鸾笙戴月碧云稀几回剪尽西牕烛又听山钟数杵飞

次雪溪上人秋兴韵

灵峰寺里讲时茶啜处铜炉一篆嘉挥尘微言穿溟滓题诗险韵趁车斜风回过雁松移影烟隐寒钟桂重花祗有新吟犹习气自余诸事鬓今华

答清江皮季贤见寄

古人千里梦相求咫尺翻增隔絶愁云护牋题醒处墨雨深树色绿边楼文章正法追前哲句律新功却俗流为问几时谈到剧寿枫南畔菊花秋

送族弟元迪

老去逢人怯送行弟兄分手若为情明时难便高才隐为客当令远业成桂岭寒烟通郢树迢遥夜雨入彭城明朝便自堪回首不待秋风过雁声

寄詹正之

几驿相望两鬓华书题不寄雁行斜但令天下称知己可为江南故忆家乐毅台空烟在树鲁连城圯雨残花燕齐胜事多收拾定有新诗处处嘉

观除目有感寄皮德昭

偶将除目到幽窻坐对撑犁事满腔知是乘桴欲浮海如何陋巷问为邦一庭月冷惊秋照三寺钟声接远撞听罢无眠闲忆得灰心底用要心降

赠直心苦口道人

凉气将深暑气收芳华零落思悠悠道人心口如神验我辈穷通与道侔鹤为乘轩能致妬马因立仗却招尤世间只有闲鸥鹭野水如天得自由

无题

鴉尋流水遶村迷雁失寒菰落渚迟老杜旧传餐玉法马迁新睹采薇诗谭空渐入皆空境观物宁非闭物时闲忆年年溪上路梅花开遍向南枝

舟中次涂云章韵

久矣坐忘如子微元非强学介之推良工未肯【阙】樗散新学何为迎璧师山路雪深联辔稳江流风淡落船迟此时此景周旋好长遣闲中费梦思

题崔伯明诗卷

海底珊瑚不易收俄然在手醒双眸娲皇炼石天无璽织女机丝月共秋一草作花生自别三年刻楮巧堪羞客牕灯影谁为伴雨响空栏彻夜流

壽黄希尹

寿星移次东禅近甘雨生凉晚梵宜心地平平真活佛书乡郁郁有佳儿春浓宝树开花处日丽丹砂掷米时知是文吴俱不老三神山碧酒盈卮

送郭竹堂赴南台

圣代人英第一流霜台粉省总优游我知陈阮谁争长人诧臯夔可与侔愿作良臣安用激亲逢治世更须忧六朝形势江山在且与诸公共唱酬

题皮季武所抄吴草庐周栖梧孙少初皮季贤四十年前合皂碧崖联句後

皂岭清游记昔年弥明杰句尽难联公如乐正超诸友我似延年咏五贤自古高才须盖代无前伟绩定由天世间何限经纶手独立苍茫意不传

答谕仲本

闲身未必受人羈为要携书教阿宜素学日从前哲究此心偏与古人知由然柳下聊同俗老矣徐娘已昔时只道暮云无用处彩霞五色照天奇

答胡器之

记和车斜四韵诗谁期此别许多时但逢来客长相问每向无人又入思心在不知身各老语深偏许策同枝空云聚散悠悠者底用闲愁挂一丝

赠丁教谕

芙蓉仙客果能仙百事精通不等闲未入汉庭陈奏牒先从周制作医官缓寻芳草多谙药笑指遥岑便说山已得一吾人印可更求数语与谁看

题陈达观浪吟集

语浅遥知人意深仰难【阙】俯难临缙山驾鹤月千顷虎峡啼猿秋一襟斗极光寒天识劒阊城境絶客成槎马蹄飞电长安近直上鳌峰一万寻

袁氏双头莲

芙蓉菡萏冠诗骚一萼双花少所遭周日夷齐清并峙尧天巢许洁同高石丁可是神仙侣楚闽终为儿女曹卧雪门庭宜着此露香霞艷映兰皋

送达海提领

军山山下旧监州人物科場第一流千尺栋梁宜九室一官朱墨费三秋甘泉侍从须扬子贞观封章欠马周从此金门多应制新诗能寄故人不

次吴草庐花晨韵

我知居士病全安难敌谈锋舌本乾花外偶迎风日美人间已作画图看江行唱和今犹盛东见追陪意更謹吟弄迢迢归路好廓然天宇似增寬

再用韵答周昂霄

布袜青鞋试步安徐披山径野花乾可欣久别能相聚便有新诗得细看七尺形容终解老一时真契且交欢百年尚远身长健若比朝菌岁月寬

送詹伯昌曹州迎亲

步往迎亲此役宜五千里外快心期近曾读律知名例早事通经识孝慈钜野天清绡帙稳长江风淡布帆迟企予相待封溪上枫叶芦花秋尽时

由清江赤城观至宝塔寺暮归樟镇

自笑野人多野思并村随处意闲闲赤城观里折丹桂宝塔寺前迎晚山隔水归樵分路散冲岚飞鸟认林还祇言十里街头近不计黄昏便掩关

酬揭曼硕赠别

来日君还在我前归时我独占君先
冰寒断道鸣驼外雪暗空村落雁边
画省诸公扶日月南州孤客记山川
松声多处黄精好举手青霞始学仙

任城南

自爱清游自怆神五千里外独归身
马嘶平野呼鹰吏犬吠寒沙射雁人
直北关山初合冻近南气候渐知春
苍苔白石梅花路长忆驱车鲁水滨

鲁桥发舟喜赋

几驿荒程不候鷄坐车和梦向南驰
才辞薛国沿清泗已指彭城望下邳
榆柳无情随日变风霜有力待人知
二王台下船如织谁荐香苹酌一卮
【沛县上濮王项王二台】

秋夜独立有怀

秋老谿贫独夜时筇枝移徧响虫飞
山城鼓叠月生海林屋灯寒风动扉
带雪关河人别久隔天书札雁来稀
忘情【阙】有难忘者黄叶一庭霜满衣

偶成

初啼山鸟篆香斜荏苒明时翫岁华
三日雨深春在水一林烟湿暖生花
寻盟旧卷鈎帘展开禁新醅隔竹赊
却忆去年归渐近半篷残雪上寒沙

壬子元夕

【阙】市人【阙】啼倦鸦常年歌吹
稍喧譁夜风十里灭灯影春雪一林
寒杏花冻泞渐深緘蛰户新滩微壮
夺鸥沙西林樵客同炉炭闲试香芳品
薺茶

陈虚一尊师山房雨後

一片闲心倚石坛千峰向背碧当轩
海门雨气悬虹影洞府香风粲鹤言
絶艷槿花深映户生红荔子密园村
早知千里移家近久办黄冈十亩园
【黄冈多荔枝】

寄乡信

謠俗伧荒越下州西风孤旅倦悠悠
酒罇女静花落树鱼市人归潮满沟
乡梦频经关上月书题分寄海边秋
已期待腊西村畔春在梅花雪暎洲

种菊久客遂尔芜蔓扶植成诗

菰菊幽湾种种殊偶然久客遂秋芜旋裁竹架扶枝?频汲泉花救本枯晓露渐寒觚绽否夜风微动觉香无几多名品人应识倘有良工入画图

得家信

俗尚难公不取谐木陰深处玩苍苔身抛世累终相着心怯乡书重一开极目云天鸦阵黑满林风雨雁声来平生最有看花癖何处溪头发早梅

遇揭曼硕有赠【时特赐其父荀坡贞文先生奉勅立碑】

十年相隔忽相见犹记书题独故人京阙诗传多应制里门碑建独荣亲梅花满暎林扉雪柳眼初迷辇路春知是高情难去住此身谁是自由身

新淦暇步作

松筠色润翠成围鹅鸭声多水渐肥隔野贩人争野路迎年姹女试新衣暖烟黄柳知春到残雪青山伴客归茅屋酒旗随处有悠悠世事尽相违

黄籀醮

道真法力贯穹圻炯炯灵襟感应机万里东风人独立一天杳雾鹤双飞瑶坛封事披云彻碧海游仙戴月归恰是广寒新醮罢夜来花雨打牕扉

元日

圣主龙飞肇纪元野人相贺板扉前不知顔色老昨日共诧时光胜旧年井口杏花春食雨墙筐柳蕊暖肥烟长沟缓绕风猗緑林下乌犍渐受鞭

读荆公集

古来遇合几君臣无奈生为叔世身大志本难酌远业诸公同是忌南人风高碧汉孤翻翻波浪沧溟独纵鳞每恨孔明参佐劣费禕蒋琬尽难伦

又

持方试药詭能医失着推枰却付谁东阁招延宾履散彤庭抚问使车驰蒋山旧宅僧堪托白下新诗柳最知宇宙茫茫经世事周官今又废多时

寄智玉成

僧来能说近平安密抱陈编独细看每恨故人疎覲易无情估客寄声难四窻人寂百虫语千里梦回新雁寒心事书题俱草草西山几叠碧云端

合皂山福地

两崖松竹緑萧萧时听岩陰响野樵鹤信早归题籙客蜂房分缀链丹寮晋时月在淦源浅粤国云通勾漏遥仙驭肯忘侨鼎地风笙清夜落璿霄

题墨梅

江北江南春又动腊前腊後梅仍花三点五点雪孕魄一梢两梢铁擘杈枯根健迸石色润半身倒偃溪流斜逃禅老人招不得树穴探环今是邪

题石桥

未许兴公知此山应真飞锡於其间陰凝黑霓落半胯夜冻银河僵一湾偃月光通空翠眩回风声静雨花闲山中仙人渺何许去鹤三招殊未还

乙丑元日

村北村南笑语通铜鑪香烬蜡烛融寒鸡四起野霜缟清磬一声天海红老大情怀元壮士太平田里有东风续经且逊河汾手只拟新桃亦未工

後正月廿六日有喜

纵横乱帙翳山家且听双松啼乳鸦三日暖风生野色一川酥雨入桃花木多山市无人问恩重纶音有客夸赢得乘闲随喜去溶溶春水遶平沙

邹悦道哀词

八牕九室失般倅善斲无人转可悲曾就功名遭记录竟将文字老明时门生定展王通学旧友谁成郭泰碑无限哀悰歌不彻落花如雨暮云垂

自罗源沿溪寻梅得之喜赋

罗源波畔野梅稀流水油油引步迟曲坞深烟将淡处前峰薄雪欲消时槎摧铁干緑苔点梢拔霜条丹萼敲说影谈香花定厌迎寒袖手倚疎篱

会吴学士于山水村

仙家山水鬱葱边今日重来翰苑仙五百里间星象动一千年外画图传【晦庵画於聚星亭】寒泉会粹书还就短简赓酬句倍鲜不待职方添记注门生语録已成编

黄氏尘外亭

金华仙子与神谋别有乾坤作胜游天外客来谈太极洞中日永对纹楸花香四合岛霞晓笙响一飞山月秋谁道蓬莱三万里一壶元只在街头

寿吴草庐八十

四朝加礼聘车勤又际龙飞沐异恩圣主执经常赐坐大官承学尽趋门格天勲业身徐退平地神仙道愈尊春有八千才八十桃花红嫩酒盈樽

题金石録【即云萍録】

胸中舒卷任闲情尘介何由置重轻虞子自知书可着伯夷非待史为名碧云一夕度归雁红雨千林啼晚鶯聚散偶然无足计世间甲子又新晴

赠墨者侯生

远心每计百年寛壮事俄归两鬓斑周凤不鸣诗已废鲁麟无迹史难删寒陰十日雨花急长啸一声云影还多谢侯生墨如漆草堂无字可斓斒

庚午上元【是年江西大饥】

九野凄凉魂不招又知今夕是何宵丛祠月黑寒?聒山市烟深臙雪消遗事谁编传旧俗梦华有记录前朝一枝柏烛【阙】然处香谱茶经共寂寥

枫陂即事

几杯残雪寄遥岑一舸轻岚并曲浔晴气贯山虹碧动阳光着柳粉黄深衣裳炫路通隣里鼓笛粘灯聒杜林左顾右瞻忘费日老人态度少年心

七言排律

黄养浩得水石山有诗自和索余同赋

壶中未识九华奇先读坡公唱和诗天竺分峰应佛送仇池通穴许仙窥拾时山静云相伴归处家遥月共随书史轩牕多胜赏蕙兰蹊径换幽规花边汲井泉频涤竹下安盆几隐【阙】

百匝端详无【阙】喜四隣惊讶颇成疑家童习懒愁添约野客生贪黠欲携已废朝眠迎露
立更疎晚讲对霞敲人言每事皆为累我谓高情未易知尽见蓬莱几清浅菖蒲遮莫待花迟

知非堂稿卷五

卷六

钦定四库全书

知非堂稿卷六 元 何中 撰

七言絕句

穆山

寒云十里踏沙堤断雁数声心自悲不见悠悠官道上前人已远後人迟

舟夜

拓去篷窗月满襟萧萧惊雁堕哀音不知天意何仓卒数叠寒云万里陰

访曾士益

酿雪不成云未阑楼危笛裂雁声残江南江北梅花梦梦入空山共苦寒

海棠

冥鸿衔子锦川来嫋嫋柔红花数开花睡未醒春未透半空飞雨暗苍苔

西屿

野色山光尽可诗倦来把定钓鱼矶晋成东去唐成晚花信无风春自归

即事

落红瑟瑟叠苍苔古径无人独到来野蝶山蜂浑不见春风更许草花开

江行

悠悠行客渐黄昏隔浦人家已掩门谁与飞沔游海上乱鸦无数下西村

雪

天风摇动玉京移九野苍茫一望时老树细观犹似旧好山何处不堪疑

其二

我疑玄帝巧铺张万落千村入混茫但得减租寛物役何须如许压遗蝗

其三

前锋飞霰决云驰後拒狞飈裂地吹江上梅羞顔掩玉崖边松老鬢成丝

其四

汲甕烹茶火未残敲诗刻烛夜将阑征鞍扰扰江南北似是梅花怨苦寒

清明

墟落无烟草树昏一樽萧索酹残春吴陵晋庙凄风雨那怪荒阡少祭人

夕阳

夕阳尽入笛声中两岸樵渔一水通杨柳已疎枫渐落黄花浑未识秋风

昨夜

池蛙鼓吹已成痴穴蚁侯王更自迷昨夜孤窻何所似三更风雨五更鸡

落叶

当春已惜片花飞緑叶成陰事转非啼鸟唤惊人梦觉秋风零落叶全稀

独来

黄花自是最难开待得开时我独来篱落不知天地晚何人却采落英回

絶句

山似芙蓉向晚开水如罗带束林回世间只有闲鸥鹭立尽寒空待我来

杨花

万点杨花倚石开千层櫻叶下山来诸峰窅窕深春緑独自冲烟看几回

次史药房池上即事韵

万蕊蜚香百草芽帘旌不动柳陰斜幽禽还识栏边客曾立东风仗外花

夏日偶成

香透池荷入户生静如老宿不看经一林深緑清风度递出玄蝉长短声

登高

数峰高耸万峰低看到斜阳意欲迷一朵碧云深浅碧殷勤只在数峰西

随兴三首

路转林深香未穷林光尽处麦光通长安花落朝三殿曾有桑麻万世功

其二

红雨丝丝緑渐深万年芳树转春陰画梁幽谷谁轻重莺燕【阙】春觉【阙】心

其三

【阙】空香静牡丹寒远笛声沉恨未残寂寞繁华今古共一溪晴雨倚栏杆

对樱桃

淡淡春烟淡淡风两村桑柘翠相通东皇太一功成去熟徧樱桃一树红

雨行

手决飞云未易排幸逢佳树不相猜数声急櫓隔林去一阵归鸿冲雨来

秋原

稻花香里听潺湲路入高原犍草闲生长太平无所用且随残照看秋山

小斋独坐

老苏朱墨十分工应笑林间远世踪翠树玄蝉秋满院更添何处一声钟

初春

年华来去野梅识春意浅深沙柳知偶到前村闲指点数峰残雪淡晴时

雨中遣兴

万壑千岩梦寂寥飞淙落涧夜萧萧觉来忽听儿童说昨日榕阴有石桥

二

来时榴树绦云遮今见盃盃坠颗斜莫待镜中头尽白闲情都付粤东花

三

双鱼容易托飞邮潮水无情上剑州占得千峯深处住门前溪水更西流

听雨

山家祇隔面前山惯得书题不往还秋色定随连夜雨幽花细草满西湾

题云烟叠嶂图

古木苍苍定有村千峰犹带雨余云逢人却问桥东事林外飞流壮几分

题钱舜举小景

绿树深深波渺渺书楼高映碧峰寒柴门扫就无人到未必能令【阙】看

题观澜图

三间茆屋下书帷乔木森森密?垂万壑千岩人不到静看山下出泉时

题曾祖说诗集

贯珠编玉粲寒牕红烛摇花省漏长断雁绕云飞不下数声瑶瑟起潇湘

丰城道中

一洲烟气一洲寒沙尾飞鸥胜我闲前日西山今不见云来犹自想西山

雪中戏成

我是天仙第一流水晶帆跨玉龙游千岩万壑水壶里神观清明得自由

题潇湘秋色图

瑶瑟无声水自流黄芦黄叶满汀洲苹花欲采无寻处一片闲情万古愁

穆山

一陂凝绿倒垂天直上层峯积翠边迢递烟云三百曲水声徐出石门前

又

老木悬崖径最峭山风刺刺水萧萧缘源不记梅栽处忽遇微风在石桥

客来

绿树阴边翡翠飞笑吟佳客坐书帷井华汲就茶烟发看罢数峯秋雨时

维扬道中

淮天如水水如秋叶叶渔郎下钓舟北畔荷花南畔柳殷勤送我到扬州

二

香霏满棹渡长沟浓着秋光浅着愁日暮女郎清唱发鸳鸯斜拂柳边洲

三

聚柳成村水一湾【阙】鸥分趣棹歌还今宵系?知何处好在红菱紫蓼间

无题

玉雪容华翡翠衣?青贴领髮云飞共郎急趁斜阳渡不惜黄沙走马归

二

惯得骄骢识妾家佛桑庭院绣帘斜镂银合子槟榔片戏喷猩红散唾花

三

天妃庙前斜日时女郎歌断彩鸳飞林花满地瓜船散城里官人排马归

四

乌石山前飏酒旗醉来健倒日平西蔡家石刻端明字卖与他人作墓题

五

丞相堂前草暗堦尚书池上树生苔子鱼风起秋无路记得谁家甲第开

题陈舜卿龙卷【舜卿名俞丙辰进士草亭其自号】

妙舞当年色艺精吴宫晏罢梦难醒早知画得龙千卷留与闲人记草亭

送人游玉笥山

咫尺箫仙玉笥家水香二十四溪霞携书便欲随君去长向云间扫落花

?沟

衰柳残荷并惨然青山隔岸弄婵娟多情惟有?沟水长送江南过客船

见梅花

水合金河雪暗残内家难覓一枝寒祇应独结梅花伴水远山长信意看

微雨

一天微雨湿芳尘红绿相依几聚春家在海棠花下住伤心长是未归人

放船

晚色重重放客舟轻风吹漾落潮流林峦尽异来时路知是明朝到福州

莆阳歌

两两筠篮温暖烟窄衫短鬓裊行肩到门迎着郎来早持向街头卖海鲜

黄沙道中

深浅寒烟曲坞间杉皮小屋遶幽潺紫苔青石梅花路随处闲看雪後山

山行随兴

暖风吹雨湿平沙远色疑青草欲芽谁是多情能爱我野梅一路牕前花

又

金石台前鸦乱飞空蒙山影出陰霏野塘水活柳生眼茅舍聚人迎妇归

清江道间阻雨

峰影微昏树影明人烟深浅水纵横前时逢雪今逢雨长在江南画里行

凌云山房雪中

山寺孤钟撼晓残西窗窗外玉珊珊开门忘却阶前石惊问何人叠雪山

又

万顷寒辉贯碧霄一林清响落金飏梅花开就归时路莫待前山雪尽消

新淦蓝步溪

陰靄通烟翠作霏春风入雨暖成泥女郎挑菜不知湿调笑相携过水西

无题

喜遇佳期未有期鲁阳不见下春时春风好长江南树长与闲人惜子规

西风

苦蓼花开锦换洲野夫容发艷通流东风即是西风骨莫向西风误作愁

喜雨

花事安排趁好晴沙膏新换牡丹坪明年何处看花客一夜东窗喜雨声

题墨菊

橘枳兰芽玉易瑕商山一出便忘家几回惆怅梅花别并有缁尘到菊花

见楝花开

緑光深浅上窗纱砭砭讐书发已华年谱他时谁记取一株红楝两年花

酬友人见访不遇

荷笠深山采药回荆扉石径损秋苔花边稚子相迎说昨日有人骑马来

题赵太祖太宗蹴鞠图

共戏笙歌聒处春他时甘作坠云身一九明月楼头【阙】

山人解误人

荷花

曲沼芙蓉映竹嘉緑红相倚拥云霞生来不得东风力终作薰风第一花

立春近夜雨达旦

梅花天气夜尤清清得还乡梦不成知事新春随雨到四牕飞雨作春声

除夜自封溪归高渊

柳辞残牕蕊初垂麦长平沙緑转肥寒日渐温风渐软随山随水看梅归

二

归人元自少归情不计程期且缓行沙步酒旗村鼓乱连林鸟雀尽懽声

三

鸳鸯翻雨戏回溪溪路迢迢湿翠围隔竹杏花红万点何因知我此时归

四

鬢鴉橋北試春衣
濃粉深脂潤画眉
板閣磚爐相聚處
欣然說着看燈時

五

螭旋西磴轉東源
竹掩松遮又几村
家在江南幽絕處
千峰帶雪繞柴門

豫章登舟作

城南無樹識神仙
閑往閑來四十年
西岸青山東岸塔
爲誰相對老秋烟

象牙潭

水禽兩兩樹三三
近浦遙峰隔嫩嵐
新換一天秋色別
短篷又過象牙潭

絕句

芝谷山前日荷鋤
柴門生事轉蕭疎
放翁老去真堪笑
猶向人前說讀書

春風

杏花紅度海棠紅
綠展平沙拂嫩茸
共愛春風猶是舊
誰知不是舊春風

自笑

世情多識事多諳
長對雲山共笑談
煮石采芝隨意足
凭君莫唱望江南

豐城道中

江村南北笑聲頻
紅燭花時次第新
春水漸生桃葉渡
小舟時載嫁歸人

二

曲江灣處小瀟湘
礪柳疎垂雁落行
暫系一篷寒綠里
數聲清響夜鳴榔

知非堂稿卷六